

奉天 平巢事蹟考 錄
唐書直筆 讀舊唐書隨筆







奉 天 錄

趙一元 著

編主五雲王

編初成集書叢

種三他其及錄天奉

中華民國二十六年十二月初版

嚴朱

發行人

王雲五
長沙南正路

印刷所

商務印書館
長沙南正路

發行所

商務印書館
各埠

(本書校對者黃聿祥
潘同會)

奉天錄序

緬尋大古之初。真源一味。自然樸略。不同浮華。雖垂不載。至軒轅氏征蚩尤而廓清四海。帝舜黜有苗而綏定萬邦。逮乎三王。則弔人伐罪。暴秦則兼并天下。漢高祖夷兇靖難。光武討叛懲奸。魏武破袁紹。晉武滅苻堅。宇文氏破高歡。普六氏平陳國。太宗擒王寶。肅宗定安史。故曰亂者理之源。失者得之府。法令施而逆子誅。春秋書而賊臣懼。建中四祀。朱泚作亂。居我鳳巢。忠臣義士。身死王事。可得而言者。咸悉載之。使後來英傑。貴風義而企慕。承危伺隙。與時浮沉者。其徒非一。正史備書。故闕而不錄。志懷問鼎者。不敢漏網。口失簡書。直筆直言。無矯无妄。欲使朱藍各色。清濁分流。質而不文。焉敢潤色。恐史筆遺漏。故備闕也。李忠臣三朝名將。忽爲叛主之臣。洪經綸累代通儒。乃作趨時之士。其餘源休、蔣鎮之輩。敬忠、日月之徒。蓋屑屑者。何足道哉。每思南史之筆。班馬之作。莫不廢食仰歎。且洪流壞堤。猶可塞也。烈火燎原。尙可撲也。逆臣賊子。難可邇也。睹此妖孽。搖動中原。莫不痛心疾首。是用書之簡素。使好我者慕。惡我者懼。元一代居關右。世業三秦。親睹櫓槍。媼妍必記。雖形闕奉親。而內懷其孝。身乖事主。而心荷聖恩。每覽嵇紹。紀信之高義。感千載而仰慕。尋淖齒、王敦之遺跡。思奮劍而誓心。疾惡之志。切于寤寐。起自建中四祀。孟冬月上旬三日。涇原叛命。終興元二年孟秋月中旬。有八日。皇帝再復神都。于中可否。總紀其事也。夫史館之筆。才識學也。苟無三端。難以措其手足。元一不敏。敢竊鳳凰之一毛。以効騏驎之千里。獨學而無知。

孤陋而寡聞。跡不踐于邱門。文有慙于先哲。輕塵罕增于巨岳。墜露無益于廣川。輒申螢燭之光。將助太陽之照。述而不作。有媿老彭。冀革前非。用警來祀云爾。

奉天錄卷一

唐 趙元一著

建中四祀。先是襄陽節度使檢校右僕射梁崇義。自阻兵不朝。二十年矣。上在春宮。情深憤惋。及登寶位。有誅四兇之志焉。詔劍南節度檢校工部尚書張延賞。東川節度御史大夫王邕。洋梁節度御史大夫賈耽。江陵節度檢校工部尚書張伯儀。淮揚節度司徒陳少遊。淮寧節度同平章事漢南漢北招討使李希烈。充都統諸軍平襄大總管。王命頒行。分路齊進。默奮龍驤。謀臣盈幕。武旅雲萃。旗鼓纒施。兇徒瓦解。乘勝逐北。如巨海之沃螢光。漢水浮屍。似秋風之吹落葉。崇義之首。懸于朝矣。世祖昆陽。謝安淝水。各一時也。詩云。無拳無勇。職爲亂階。斯之謂矣。都統李希烈。自謂有尅敵之功名。居然有都襄之志。有詔勒歸本鎮。然生不諫之心。乃劫其郡。席卷而歸淮寧。凡掠良家子。姓悉爲賤隸。六畜資財。埽地而盡。昔太武瓜步迴師。六州無雞犬之響。游子望舍。不識舊廬。元兇之拔襄陽。甚于斯酷。遂縱師陷我汝州。河南尹鄭叔則表奏之。上命工部尚書兼右僕射哥舒曜。總禁兵五萬而討之。師謀士銳。所向莫敢有爭衡者。長驅築壘于襄城縣焉。時國家多故。河北幽冀。蝟毛蜂起。三輔兩畿。徵兵日繼。皇赫斯怒。爰整其旅。詔河陽節度御史大夫李芄。太原節度檢校工部尚書馬燧。澤潞節度檢校工部尚書李抱真。朔方節度太子少師李懷光。神策制將御史大夫異姓王李公晟。華原鎮遏使御史大夫趙令珍。分路長驅。深入賊境。雖王師頻

勝而寇亦不衰。勝負相參。殺傷萬計。時軍用既多。不遑遠略。戶部侍郎趙贊上封事。請稅三輔兩畿居宇間架。及取兩市富商大賈。于西明。慈恩二寺置院檢納。貪吏深文。怨及社稷。太史奏曰。窳門出天子。有詔去城七里內諸窳盡廢之。及泚稱兵。乃是涇原節度姚令言爲謀主也。時哥舒曜孤軍無援。糧儲不繼。賊得其便。重圍數周。甲士日唯半菽。馬淘牆皮而芻焉。潛表請濟師。詔神策副將行營兵馬使御史大夫劉德信。御史大夫高秉哲。各馬步共一十萬來救襄城。勅大梁節度使司徒李公勉發師。犄角而攻之。軍書往來。同會于汝州之薛店。軍令不嚴。爲伏兵所敗。三將之師。望旗大潰。戎器委數百里。鐵馬一萬蹄沒焉。洛陽士庶惶駭。北走河陽。西奔嶠隄。東都尹鄭叔則入保西苑。唐漢臣奔于大梁。高秉哲。劉德信收離集。散駐軍于汝州。詔涇原節度姚令言赴援。總師五千。東之滄水。時京兆尹王雄。屬吏置頓。牛酒儉薄。將士已厲。遂傳箭而迴。十月三日巳時也。令言尙在紫宸殿。授以樞密。并賜資金帛。時御史臺左巡奏云。涇原士馬違命迴戈。令言星馳至長樂坂。逢之。有引弓射令言者。遂擁令言而迴。上又使使勞問。賊已列方陣于通化門。門衛拒使者。強之而未及。宣旨言加不順。上又詔普王及諸王侍書等宣慰勞之。許以重賞。又載金銀帛繡等二十餘車。普王纔出禁城門。賊已至于丹鳳門。詔召六軍。久無至者。時關東河北頻戰不利。屢發禁兵。相次東征。警衛遂虛。上乃出自苑北門。六軍羽衛纔數十騎。或曰。朱泚是失意之臣。恐懷僥倖。不如遣十騎捕之。使陪鑾輅。若脫于泉。爲害滋甚。不然。以卒誅之。養獸招禍。立可俟矣。上與儲宮經略不遑。而賊已犯禁門。遂以普王爲先驅。皇太子爲殿。韋淑妃。唐安公主。親王。貴妃等一百餘人策騎而去。

乘輿次于咸陽。咸陽令李衡俯集其妻親奉御膳。上命貴妃以下接以恩禮。傳飡而過。神策軍使御史大夫白志貞等十數人扈從。門下侍郎平章事盧杞、中書侍郎平章事關播、御史中丞劉從一、戶部侍郎趙贊、右羽林軍使御史大夫令狐建、京兆尹王雄、駕部郎中郭雄、翰林學士陸贄、吳通微等悉于咸陽而及焉。郭曙與家僕數十人于苑中獵射。聞蹕。伏謁道左。上宣勞之。志願翊從。上許之。駙馬郭曖先與宮主失意。上收宮主在內。隔絕經年。及此。曖馳往。覓得公主。策騎俱赴行在。三日夜四更至洛驛。奔及乘輿。四日平明。至于奉天。丞尉惶懼。拜舞于縣門。其日上幸縣令宅。宰臣近侍各居廡署。時右金吾將軍御史大夫渾公瑊討賊之迴戈也。渾公與家僕數十騎自夾城入北門。收集後殿與敢死之士。欲擊賊。乘輿既出。遂奔行在上。以渾公爲工部尙書。行在兵馬使渾公有膽略。泚素憚之。旣而乘輿乃安。時奉天備禦防守皆渾公之謀也。君子曰。高祖困于彭城。而用陳平之策。漢祚興焉。晉武得謝安石。晉室無替。古君子亦有是夫。渾公雖武勇絕倫。而謙讓無匹。乃以令狐建爲行在中軍鼓角使。嗣滕王湛然爲金吾大將軍。嗣鄒王寓爲右衛大將軍。前神策軍京西都虞候侯仲莊爲金吾衛將軍。兼御史中丞。奉天防城使。兼右廂兵馬使。仲莊有剛勇。善謀略。保衛之功。次瑊之勳也。初建中之始。術士桑道茂奏云。國家不出三年。豎有離宮之象。臣望奉天有天子氣。宜制度爲壘。以備非常。上以道茂言事數驗。遂令京兆尹嚴郢充築城使。具畚鍤。抽六軍之士督策之。時上初卽位。刑清俗泰。盛夏而土功大興。遠近不知其旨。及此都焉。上初幸鳳翔。依都府而謀尅復。或曰。張鎰雖陛下信臣。蒞職日淺。所管勁卒皆朱泚部曲。本漁陽突騎。兇衆城中旣立。

朱泚本軍必生大變。以臣度之。非萬全之計也。敢以死請。上亦悟道茂之言。遂改幸奉天。至其月六日。李楚琳殺張鎰而歸朱泚。初。令言陣于五門。禁兵不出。百姓觀者巨億。遂整旗吹角。入含元殿前。先鋒自龍尾道上于中間。周呼曰。天子已出。今日共取富貴。兇徒大呼。有頃。入宜春院及諸宮。時倉忙之際。本朝禁衛騎士及坊市百姓。擔負財帛。填街塞陌。連日竟夜。旣而羣盜與令言謀議。慮難持久。或曰。太尉朱泚久囚。必生異志。若迎而爲主。事可捷矣。遂于招國里。以禮迎之。泚畜姦伺隙。久懷非望。羣盜旣至。僞讓不從而命。爲使者設食久之。以觀衆心。于是火燭星羅。觀者萬計。泚入居含元殿。四日平晨。出榜。榜曰。太尉權臨六軍。○原作臨六年。依秦刻改。與通鑑合。國家有事。東郊徵涇原師旅。銜命赴難。將士久處邊陲。不閑朝禮。軍驚御駕。乘輿已出。夜定。見神策六軍。金吾威遠。英武并百司食糧者。三日內並赴行在。不去者。卽于本司著到。如三日後移牒。勸彼此無名。當按軍令。議無容貸。泚移居白華殿。朝臣見者。悉勸迎駕。泚頗望錯愕。知未得衆心。源休入移時。籌之言多不順。勸以僭僞。泚甚悅之。猶尙未決。上初巡幸京城。朝官莫知上所在。分路探候。然後乃知。源休旣陳矯計。切勒十城門。不許出入。時六日夜也。上初入奉天。有上封事言。叛兵共立朱泚。兇徒必來攻城。請爲備禦。門下侍郎盧杞切齒言曰。太尉忠貞。朝野共知。柰何有此。傷大臣之心。安可令泚聞之。請以百口保泚不反。後二日。泚變梟獍。至于城下。上料近藩兵馬。可以赴難者。頒下手詔諭之。皆如期至。帝尙以忠臣待泚。又知公卿勸迎。且令諸道軍士三十里下營。時京兆府功曹姜公輔赴行在。拜門下侍郎。平章事。俯伏而奏曰。王者不嚴衛。無以重威靈。今禁旅單寡。翊衛未備。若泚忠孝奉國。固不

以兵多爲慮。若狼心已變。則有備無患。今士馬在外。深爲陛下危之。卽日召兵入城。逮泚攻城。已戒嚴矣。朱泚旣納源休僭僞之說。又得幽隴三千人。與哥舒曜救援。行至澠池縣。聞朱泚僭僞。返旆投泚。泚自謂衆望所集。于是以源休爲京兆尹。判度支。李忠臣爲皇城留後。泚以段秀實爲心膂。發銳卒三千奉迎。乘輿陰起逆謀。秀實潛謂劉海賓曰。朱泚是薊門一卒。去逆効順。先帝嘉之位。登台輔。不能見危授命。而乃晏安兇醜。吾位歷司會。策名九寺。雪國之恥。雖死猶生。爾能從乎。海賓曰。忠臣節義。死而不亡。敢不唯命是聽。因擇能行者追賊兵。曰。城中有變。使者六日一更行。及洛驛。虜劫而迴。驗符。乃秀實詐爲賊帥姚令言帖。用司農寺之印也。賊泚用仇敬忠爲同華等州節度使。拓東王以禦王師。用異姓王李日月爲西道諸軍事。經略使。上初至奉天。用御史中丞高重傑爲平虜使。屯兵于梁山之西隅也。時與李日月頻戰。官軍大捷。後被伏兵。死于鋒刃。朱泚出榜兩市。及署兩坊門。曰。奉天殘黨。蟻聚京畿。重傑等仍敢執迷。拒我天命。朕使偏師小將。果復敗亡。觀此孤城。不日當破。雲羅布網。無路鳥飛。鐵釜盤魚。未過瞬息。宣布遐邇。各使聞知。僞兵部員外古之奇詞也。初。重傑縱騎追賊。獨出于三軍之首。兇徒埋伏邀之。落其奸。使被兇徒生擒。親事數十人。以伏事之情。亡軀而奪之。兇渠雖衆。追者氣銳志堅。奮然不顧。遂被逆黨斫重傑頭而棄其身。親事收其神柩。入奏于奉天。帝見之。撫屍而哭。或諫曰。裨將死。撫屍而哭。越禮也。帝曰。大禮非卿所知也。艱虞之際。死于王事。愍惻豈拘常倫。遂盡哀而哭之。命有司造蒲頭。安之頸而埋之。朱泚得高重傑頭。又集僞百官大哭曰。忠于彼者。亦義于此。爲朕之無禮。殺我忠臣。又命僞有司作蒲人身而安其

首以三品葬之。皇帝再尅京師。詔有司發舊二塋。取其首。別爲封樹。贈工部尙書。喪葬官給。時李日月兇威甚銳。燒燕陵廟。帝甚患之。謂渾公曰。朕不能保守宗祀。尅平多難。致使六合沸騰。宗廟失主。焚我陵闕。兇威轉熾。應是殷憂之時。代終百六。唐堯禪舜。虞舜禪禹。自古有德者進。無德者讓。有自來矣。今天地鼎沸。淮楚搖蕩。幽冀蜂起。萬方震懼。請從禪代。以救蒼生。卿等如何。渾公泣涕如雨。身被鐵甲。舉身自撲。君臣悲淚久之。渾公奏曰。夫聖人不困不成王。烈士不困行不彰。昔高祖迫于項籍。世祖窘于昆陽。隋文帝厄于雁門。魏武保于南郡。三王五帝。其猶患諸。況陛下承百王之末。威靈邁往古。小有逆否。而懷扼腕。臣下之罪也。願陛下以社稷爲念。無以小賊爲憂。臣請自出一行。梟逆賊之首。卽冀宗社永安。唐堯垂拱。臣之願足矣。上曰。朕在蒙塵。卿爲肺腑。別募裨將。卿不可也。渾公曰。北狄恃金牙之威武。頻犯郊畿。鄂公取之。若指掌。臣若不行。兇威轉甚。上許之。渾公先以數十騎從西門出。埋伏于莫谷之隅。公自將數十騎從東門而出。直抵朱泚營壘。泚驚不覺墜榻。羣盜大潰。公以騎少不足逞銳。遂引而西。李日月縱騎追之。至城西門。渾公謂家僕曰。立功立事。只在今日。與卿此捷。何不取之。僕人彎弧射之。李日月應弦而斃。朱泚鋒刃。十亡八九焉。家僕者。卽渾公之所役人也。字小金。有詔令公賜姓李氏。封異姓王。以賞飛矢之捷。用旌武功也。初。李日月中矢而死。朱泚備禮。送于長安休祥私第。母氏苛尅而不哭。厲聲罵曰。奚奴。國家負汝何事。敢生悖逆。死猶晚矣。朱泚備禮而葬之。母氏始終不哭一聲。皇帝行在亦知之。及李晟收長安。諸黨並從夷戮。唯李日月母存而不問。君子曰。馬服君婦有知子之鑒。而免禍。李日月母以子叛恩。存大義。

而不哭。殊有古人之風。初朱泚謀變大事。李忠臣、源休等並皆同坐。司農卿段秀實與劉海賓伏匕首于靴中。內官覺之。時聖上行幸。羣臣疑貳。革亂之間。段公以戎服見泚。共議匡復。往返三四焉。泚情洩。于言段色厲。奪休之笏。擊泚之首。羣兇駭愕。濺血數步。兇黨持兵而至。段公被害。泚一手承血。一指羣兇曰。義士勿殺之。聲手相及。段公已害。泚哭之甚哀。封忠義侯。以三品禮葬之。海賓因兵亂而逸于通化門外。被役驅者敗之。並見害。故京師號朱泚爲熱熟堯舜。號希烈爲當年桀紂。時有風情女子李季蘭。上泚詩。言多悖逆。故闕而不錄。皇帝再尅京師。召季蘭而責之曰。汝何不學嚴巨川。有詩云。手持禮器空垂淚。心憶明君不敢言。遂令撲殺之。贈秀實太尉。諡曰忠烈。賜實封五百戶。莊宅一所。嗣子授三品正員官。諸子各授五品正員官。旌其門閭。喪葬官給。爲立廟。御製碑銘。君子曰。昔臧氏勸事君之節。空傳其名。不睹其人。千載之後。見乎段君。代有之矣。伯仁抗節。鍾牙咄嗟。有是哉。詩云。淑人君子。其德不回。其段公之謂乎。

奉天錄卷二

八日。泚于宣政殿僭卽大位。愚智莫不血怒。衛者多是軍人。周行不過數十。自稱大秦皇帝。年號應天。僞赦書云。幽囚之中。神器自至。豈朕薄德所能經營。彭偃之詞。冊文。太常少卿樊系之撰。文成。服藥而卒。故嚴巨川詩曰。烟塵忽起犯中原。自古臨危道貴存。手持禮器空垂淚。心憶明君不敢言。落日胡笳吟上苑。通宵虜將醉西園。傳烽萬里無師至。累代何人受漢恩。九日。李忠臣。姚令言並爲侍中。仍以令言爲關內副元帥。以光祿卿源休爲同平章事。兼京兆尹。判度支。工部侍郎蔣鎮同平章事。蔣鍊爲御史中丞。太常卿敬釭爲御史大夫。洪經綸爲中書舍人。禮儀使。是日夜三更。哥舒曜拔襄城。保于洛陽。初。公援東郊也。上謂公曰。卿行師出陣。與卿父何如。公再拜而對曰。先臣不敢比也。祇如斬長蛇。殪封豕。靜氛霧。掃機槍。然後待罪私室。臣之願也。上曰。伊尹去而伊咈嗣。文王沒而武王興。卿父在開元。無西面之憂。朕今得卿。無東郊之慮。及師發之日。上親送于通化門。百官翬戴。觀者萬計。則曰。茫茫楚塞。遙瞻上將之星。靄靄秦郊。自有登壇之客。豈惟漢稱定遠。晉有征南而已哉。及乎出師于通化門外。無故門槍自折。識者知其不利。以其父翰。天寶之末。師至乎北門。無故門旗自折。翰遂斬門旗官而發師旅。終有火拔控轡之難。公此行踵父之徵。遂有襄城重圍之難矣。初。公駐軍于襄城也。希烈莫不懼懼焉。有枝梧之象。時公亦以名父之子。不忝其役。實欲立功成事。待罪私室。但國軍多故。糧盡援絕。三將敗績于薛店。城中戰士中矢者

十有八九焉。城外兇衆飛矢拋木者。壕壑俱滿。公堅守孤城。糧竭于內。援絕于外。軍志曰。設有金城湯池。帶甲百萬。無粟者不可守也。公遂拔城而遁焉。詩云。昊天不備。降此鞠凶。昊天不惠。降此大戾。時希烈兵勢漸盛。南破張伯儀。北敗哥舒曜。縱師攻汴州。都統司徒李公勉棄城而逸。擁衆而投宋州。大梁遂陷。江淮震懼。賊旣入城。資賄山積。河路斷絕。長安以東。飛書不通。南方貢使。皆自宣池。洪饒荆襄。抵武關而入。江西節度嗣曹王皋。嚴口郵驛。厚其供億。雖有深溪絕橋。而駟騎不病。四方賴焉。司徒李公旣已敗績。詔以宋汴節度劉公洽充河南道都統諸軍事。悉以司徒所管配隸焉。司徒公制將曲環。前後數陳行列軍事。司徒公多不從其計。環以司徒公行軍司馬陳履華。兵馬使唐漢臣。李載等用事。多阻環計。不及與諸將同語。司徒公以不從其策。自維敗績。但唯唯然。環因叱履華曰。都統置公腹心。遂辱吾軍。命左右掣之下馬。極加責讓。司徒李公。大夫劉公。皆釋轡錯愕。司徒深自抑退。以愛惡不明。無所逃于國典。大咎在勉。非陳中丞之過也。大夫劉公謂環曰。軍有利鈍。時有否泰。昔孟明三敗。以成功。良史稱其美也。曲大夫豈得失禮于上公。環乃止之。司徒公以軍敗失士。上表請罪。上已出宮。覽表潛然。謂勉曰。朕亦不能上保宗廟。越在畿甸。軍國之事。一勝一負。卿其自安。因待之如初。十日。制將劉德信。高秉。哲。聞帝蒙塵。遂拔汝州。星夜兼馳。于沙苑。監取官馬五百匹。先收東渭橋。于是天下轉輸食糧。在此焉。軍次昭應。列陣于見子陵之西隅。二將執酌。號令三軍曰。今主上蒙塵。神器無主。長蛇逸網。魚脫于泉。臨難成功。冀在憂危之日。翦除兇黨。尅復乘輿。勳流子孫。萬代之貴。言訖。左右戒嚴。三軍賈勇。鼓聲一振。奮戟前衝。三覆其軍。王師大

捷乘勝築壘于東渭橋。時十月十九日也。初十日朱泚自統衆攻奉天。羣卒不遑禮儀。蟻聚之。衆軍勢漸雄。以姚令言爲僞元帥。僞右僕射同平章事張光晟屬焉。以李忠臣爲京都留守。十二日賊次洛驛。上使中使翟進追論惟清。○通鑑作翟文秀。慶州刺史。論惟明。此疑有譌脫。邪寧留後兵馬使韓遊瓌。士馬三千八百人。二將受詔。夕

而奔命。夜到泥泉。遲明卽路遊瓌等命其軍士分部巡探。東道遊奕人爲賊所獲。將送泚。泚問救軍多少。泚左右抑令蹈舞。賜衣一副。付僞詔書宣慰。先歸者待以高爵厚賞。遊奕人馳還。當夜發。至四更。關門納之。惟清遊瓌等再拜舞蹈。悲喜交見。上膝之前。席謂清曰。兇孽滔天。宗社不守。貞貞之節。見于艱危。卿等急于國難。朕無慮也。二將宣布聖旨。將士莫不感激。時涇原都知兵馬使馮河清進戎服甲楯垂十萬焉。上大悅。立頒將卒軍聲。遂震。十三日辰時賊軍大合。城下交戰。自辰接戰。至于申酉之間。賊徒大敗。殺傷萬計。是夜賊于城東三十里下營。周徧原野。擊柝之聲。相聞廣陌。又修攻具。上亦命造戰樓。拆佛寺及仇敬忠宅而豐其用。賊若乘城而戰。賊多敗衄。若出師戰。王師少利。十七日靈驪節度留後使御史中丞杜希全及鄜坊節度工部尙書李建徽各率甲士三千人趁奉天。賊氣方銳。設伏于莫谷。三軍深入。探候失備。奸人得計。便夾而擊之。爲賊所敗。希全等收離集散。再震其軍。初泚于奉天城東南隅下營。立表高百尺。造木檻。人藏其身。縋而上之。闕我城闕。帝深患之。召善定砲者拜御史中丞。實封三百戶。有崇福寺僧昭悟。夜應召而中之。人檻俱碎。泚不復更置。遂白日移帳于乾陵。上南望之。遂有雲梯之役。車駕還京。與昭悟官爵。昭悟懇辭不受。請充別敕崇福寺主。有詔依請。時劉德信高秉哲固守渭橋。往往出師遊奕于

望春樓下設伏皆敗績。僞皇城留後李忠臣移牒奉天城下請救兵。時姚令言士馬敗績傷者衆恐百姓乘弊而俘之。所抽救援將士皆匿刀箭夜行晝伏。泚旣迫急召機巧之匠設以雲梯刻日而就其梯高百尺闊十二丈。梯上可置五百力士。城中士庶莫不惶駭。上深懼之。顧問百官。時神武軍使御史大夫韓澄拜而奏曰。臣昔在劔南西山八州防守戰具備諸雲梯小伎不足上勞神慮。請禦之上曰。昔沛公困于項籍而得韓信。寡人今迫于重圍上天以卿賜朕千載一時。卿其勉之。時韓澄親受聖策潛穿地道嚮彼來路布乾馬糞二百車以爲火備。城上更廣城牆當雲梯相對三十步以大鏊十口各煎膏油散布雲梯之上。細剉松脂五十車內庫陌刀五千口白刃如雪排次如鱗。城外羣兇三軍齊叫雲梯旣動鋒鏑雨集。城中木石飛聲雷震俄頃之間雲梯腳陷前不得進後不得退。初梯上有濕氈矢不得入。梯腳將陷烟火爛然從地而出雲梯之上人自去氈于是葦縛雲飛松枝亂下熱膏雨散中者逼人脂傍流凡數百步。洪爛千尺白日爲之韜光沸聲若雷。知漢將之謀也。縱田單有火牛之策不可同年。陸伯言有白帝之功方堪季孟。此韓澄之計也。拜鹽夏節度左三軍統軍初雲梯之動也風勢不利咸以爲憂。渾公親率列將酌酒臨火坑而呪曰。天道助順志誠感神。賊泚兇悖圍逼君父乾坤不昧宜降大罰。因流涕被面精神感激拜訖須臾大風起吹賊軍勢益加口。潑油下脂鼙鼓齊震。王師大捷賊敗衄焉。時十一月上旬也。城中雖有雲梯之捷素無藁草糧儲罄竭賊圍益急戰士多損傷。皇太子親爲封裹巡城慰勞有頃賊射百張弩于上前三步而下。上大驚謂渾公曰。雲梯雖捷賊勢尙強位歷之數有窮。三皇五帝尙有革易朕自無德。上

失天心。請從禪代。則百姓免塗炭之苦。戰士無傷夷之患。朕之願足。渾公雨淚而奏曰。昔黃帝戰于涿鹿。帝舜征于有苗。沛公與項氏爭天下。大戰七十。小戰四十。太宗六年。擐甲。尅平多難。況陛下承丕業之餘。慶握皇圖。而援籙。萬方同軌。八表恃賴。豈以一小豎。厭棄皇家。百六之災。得爲天譴。而繫聖心哉。臣下之罪也。今請更三五日間。若不梟泚首。獻捷。則臣等甘受鼎鑊之罪。上曰。張陳尙在。吾豈困哉。君子曰。臨大難而不困者。其惟聖人乎。百度惟貞。始終無替者。其惟良臣乎。詩云。左之左之。君子宜之。右之右之。君子有之。其渾公之謂乎。時李懷光自魏博團練精兵五萬。越大行。席卷而奉天也。晉絳。蒲。陝。慈。隰。同。華。等州。並補授郡牧。頓軍于涇陽。子父相繼。可十五萬。朱泚聞涇陽戰鼓。不覺墜榻。遂抽軍。卻守長安。時十一月十八日也。朱泚圍我奉天四十餘日。用我金帛。食我牛酒。勞我百姓。三輔兩畿。轉無投義者。唯李楚琳。先事朱泚。獨爲外應。餘四鎮將帥。盡是王臣。泚抽軍江東。劔南。貢賦山積。爭功效死者。如百川之赴滄海。詩云。趨趨毳兔。遇犬獲之。此之謂也。初。懷光至涇陽。自以爲君父之讎。星夜救援。方展臣子。將用表誠。被門下侍郎盧杞陰中之。便令赴咸陽。頓軍。懷光知被宰臣所中。不得已。遂發赴涇陽。軍士怏怏。然不得其志。其月二十日。到咸陽。夜造浮橋而濟。築壘于孔子澤城。周迴四十里。中使相繼于路。金帛寶貝。美人。相望。繼踵。加宰相中書令。收城都統。至其月二十八日。制將御史大夫異姓王李公晟。自趙州拔城。從飛狐口。越白馬津。聞難駿奔。軍次櫟陽縣。有詔加公工部尙書。神策軍行營節度。駐軍于東渭橋。斬劉德信。而并其軍。公身與士卒同苦甘。家無私蓄。夏不操扇。雨不張蓋。寒不禦裘。軍氣益盛。三禮之將也。初。劉德信

軍禮不備。失儀於公。公斬之。孔子曰。何以爲身。曰。恭敬忠信而已。恭則遠于患。敬則人愛之。忠則和于衆。信則人信之。犯此先誠。其劉公之謂乎。時李希烈兵威大盛。南敗張伯儀。北敗哥舒曜。縱師下汴州也。都統司徒李公勉。不能抗節。棄城而遁。鄭滑節度李澄謂諸將曰。乘勝之軍不可敵。今以詭計羈縻而取之。以圖萬全。遂飛表行在。送啓元兇。時李納號齊王。田悅號魏王。王武俊號趙王。朱滔號燕王。時神策軍兵馬使御史中丞尙可孤。率兵五千。自襄鄧收藍田而入。同華節度略元光。領銳卒五千。自昭應長驅而入。河東節度馬燧。使行軍司馬御史中丞王權。率卒三千。鎮于中渭橋。與賊相持。泚唯據城。重賜金帛。而四隅之外。盡是王師。泚初據乾陵。使一騎于城下。招公卿士庶。以爲不識天命。城上伏弩射之。立死。時駙馬都尉郭曖守東北角。手射殺數十人。無不應弦而斃。賊衆被靡而退。曖卽汾陽王尙父之子也。先是朱泚典郡鳳翔。有貓乳鼠。表奏稱境有祥。詔下中書。詳議可否。欲編青史。衆議皆以爲不然。或曰。鼠者坎精。主爲竊盜。猫者之食。是吾君利器。伏下之義也。今返食其乳。是空我腹。賊之徵也。果有十月三日之難矣。以其年劔南山西節度都知兵馬使張沛。舉鎮五千人。叛張延賞而攻成都。縱兵至于石筭街。延賞無備。不暇枝梧。棄城而遁。投于東川。沛以溫據爲謀主。據素無才略。三軍酒色而已。延賞使諜者察其不虞。知其無備。假東川之師。出其不意。掩而取之。枝葉皆伏誅。君子曰。顏氏云。力猛于德。而得其死者鮮矣。張沛當之。又曰。丹之所藏者赤。漆之所藏者黑。以騎將之張沛所帥奴才之溫據。攀危輔朽。不敗何待。賊泚初至奉天。鳳翔節度判官殿中侍御史韋皋領隴州留後。時所在阻絕。未知適從。皋密召將帥。勵以忠誠。覽其

雄心皆靡。劾死賊將王文獎。賈僞牒誘皋。皋欲斬之。慮其禍速。乃禮而遣之。因令其將高光儀往觀形勢。既還。具揚姦計。郝通等尋破汧陽縣。義寧軍使李閔以兵會之。新興二州將王震舉鎮歸皋。皋軍容益壯。朱泚以盧龍舊卒五百人在隴州。兵馬使牛雲光僞有疾。邀皋將謀大變。皋兵馬使翟曄以白皋。雲光之黨張月桂、劉原長馳入告變。雲光乃領其衆赴泚。次于汧陽。逢泚僞中使蘇玉。賈僞詔以皋爲御史中丞。玉謂雲光曰：「太尉已登寶位。韋侍御已拜中丞。便爲吾黨。可于此還。」遂卷甲而迴。皋僞託心膂。迎而勞之。因謂之曰：「皋受新命。更無猜阻。若先納器仗。方見赤心。」雲光素以書生待皋。遂斂械器付皋。皋納之于庫。遂椎牛聚酒。期以宴賞。明日密召隊仗人。引就馬坊而悉斬之。次引諸賊就席。酒未行而伏軍發。兇黨無遺。上深賴之。拜皋御史大夫。隴州刺史特置奉義軍節度。以旌殊能。奉天士卒聞之。咸增勇氣。不復有西面之憂。又命堂兄弇問道陳請。朝廷以爲雖有誅雲光之舉。賊忽併來。終恐後敗。皋使繼到。知已保全。乃有敕賜金印紫綬。軍中功賞。自御史中丞以下。咸許承制受之。皋慮奸人反間。以阻忠誠。乃築壇刑牲。刺血誓衆。吏不拒焉。吐蕃聞之。使贈名馬并珍異等。尋加皋檢校禮部尙書。時僞皇城使李忠臣。每方圍練。人心大擾。泚自奉天行迴。悉令廢置。經三五日間。卽使人僞從城外來。布告坊市曰：「奉天已破。百姓聞者莫不飲泣焉。初泚自號其宅爲潛龍宮。移瓊林庫國寶以實之。識者曰：『易稱潛龍勿用。此敗之徵也。』未幾。百姓劫其珍異。泚不能禁。朝士多在奉天。泚班列不備。宦豎朱重耀白泚曰：『可將家屬往城下。使其招百官來。若不來。並對彼夷戮。僞中使孫知古諫泚曰：『不可。且陛下初有寶位。當以柔服爲心。使遠近忻戴。』

若將彼妻子對之殘害。是絕萬方向慕之心。人人與之爲讎。竊爲不可。于是並獲安全。賊黨既敗。城內稱慶。時淮南節度陳少遊。領卒戍于盱眙。聞難。卽日還廣陵。深溝高壘。繕甲完守。鎮海軍浙東西節度使潤州刺史韓滉。閉關梁。築石頭五城。自京口拒玉山。禁驢馬出境。以戰艦三十艘。舟師五千人。自海門揚威武。至于申浦而還。拆上元縣佛寺觀宇四十六所。造塢壁。自建業抵京峴。樓雉不絕。穿大井深數十丈。下與京江平。凡數百處。滉將邱濬嚴酷。士卒日役數千人。去城數百里內。先賢邱墓。多被侵毀。故老以爲自孫權、東晉、宋、齊、梁、陳、兵壘之故。未始有也。滉下三千人先戍宋州。卽日追還。以其所親吏盧復爲宣州刺史。采石軍使增置營壘。部內佛寺銅鐘。並鑄戎器。本司取處分。韓公判云。佛本無形。有形非佛。泥龕塑像。任自崩頽。銅鐵之流。各還本性。旣而並付鑪焉。少遊以甲士二千人。臨江大閱。與滉境會。滉亦三千人。臨金山。與少遊相應。以樓船金帛。交聘于江中。時滉以中國多難。翠華不守。淮西幽燕。並爲敵國。公慮敖倉之粟不繼。憂王師之絕糧。遂于浙江東西。市米六百萬石。表奏御史四十員。以充綱署。淮汴之間。樓船萬計。中原百萬之師。饋糧不竭者。韓公之力焉。夫漢之鄴公。各一時也。時少遊出軍五十里。日午不得食。遂行掠瓜州。揚子。鷄犬無遺。鹽鐵使御史中丞包佶。以財帛一百八十疋。轉輸入京。少遊自盡取之。佶自詣少遊止之。少遊長揖而遣。幕佐責佶。揚子院財帛孔目。佶先有守財三千人。被少遊隸焉。又加伺隙。佶心不安。遂急棹渡江。妻子伏于案牘中。佶使使飛表于蠟丸中。論少遊收財事。上深不平。信宿。少遊使繼至上。問使者。少遊收包佶財帛。有之乎。對曰。臣發揚州。則無。臣發來後。非臣所知也。上以國步多阻。艱恐更

生一秦但從容謂使者曰少遊是國家之守臣或防他盜不爾實軍府收亦何傷時方隅阻絕國命未震遠近聞之大驚咸以睿情達于通變明見萬里之外少遊聞之乃安時諸方閉境自守江西節度使嗣曹王皋東拒李希烈身在蘄揚數遣贖珍異間道進獻當時推重焉上尋命鹽鐵使包佶自揚州達荆襄轉輸東南征賦舟船萬計到蘄口希烈賊衆二萬掩至嗣曹王皋與騎將御史中丞伊慎擐甲力戰于永安柵大破之殺傷殆盡是日若微皋慎之功佶之所統並爲盜資以其月二十五日中書侍郎盧杞貶夷州司馬白志貞以宿衛不警貶恩州司馬戶部侍郎趙鄴貶播州司馬尋免間架之賦而下罪己躬詔去聖神文武之號於是李希烈李納田悅王武俊及所管將吏皆以官爵待之如初分道宣慰海內忻忻若登春臺矣其扈從奉天將士並賜名定難功臣身有過犯罪減三軍升奉天爲赤縣給復五年在縣城者給復十年京城減收兩稅之半卽興元元年正月一日也是月朱泚亦改僞號曰天皇元年國號大漢泚以國家府庫之殷重賞應在京城公卿家屬皆月給俸料以安衆心泚外賜軍士中撫班列兼修戎械之具攻守器備費用巨萬計洎泚之敗而府藏不竭識者以前後主計大臣不思萬姓之殫竭而轉展相資務損于人爲國生患皆是廟算無良陷君之罪也時赦令旣行諸方莫不向化惟李希烈覆軍不改以藍染滑石爲玉璽以折車缸爲瑞誑惑其衆年號武成國號大楚以張鸞子爲宰相孫廣爲中書令鄭賁爲侍中充汴州留後司徒劉公下汴州並從夷戮希烈以蔡州爲宮廣設門額分其境內爲四節度以安州爲南關外甥劉誠虛爲南關都統誠虛武勇絕倫希烈憑之而反後被嗣曹王皋騎將徐誠生獲送于朝廷

初朱泚僭位。使走卒趨捷者日馳數百里。送書于朱滔。書曰。昔文王囚于羑里。終王八百之基。殷湯繫于夏臺。後有解網之頌。吾頃典郡四鎮。藩夷戰懼。唐王不察。信諂諛之說。吾罹奸臣之禍。使奪兵權。雖位列上公。詔書繼至。情懷恍惚。百慮攢心。何期天道盈虛。五運更代。物極則反。憂極歡來。歷數在躬。以登寶位。涇原四鎮。士馬爭驅。隴右鳳翔。獻書繼至。三秦之地。指日尅平。吳蜀之間。已令宣示。河北一路。用卿殄除。布新令以示之。推利害以誘之。懸賞爵而招之。張皇威而逼之。驅鐵騎以臨之。橫行洛陽。與卿大會于定鼎。朱滔得書。西嚮拜舞。宣示僞詔。曉諭三軍。使令有司條疏。移諜諸道曰。今月八日。大秦皇帝已登寶位。關西四鎮。應款附請。爲臣妾。唯奉天孤城。危同累卵。不有廢也。將何以興。今披讖圖。則鼎新之兆先也。同夫夏俗。待我后以來。蘇今發突騎元戎四十萬。奮劍與夕火爭光。揮戈與秋月競色。長驅河北。至洛陽。與皇帝會蹕于上陽宮。牒魏博。恆。冀等州將士。卽宜擁節歸朝。達于先覺。必使勳流奕葉。榮及子孫。如或固守窮城。不識天命。必使覆巢破卵。易子析骸。請看今日之長安。竟是誰家之宮闕。太山如礪。可知非石之言。秋日麗天。不易勤王之意。

奉天錄卷三

興元元年春三月九日。朱滔發兵臨河北地。士馬宏壯。有驕我之色。以先有救田悅之功。希爲內應。謂悅開壁迎滔。因此欲有吞并之勢。相魏若下。河北悉爲朱氏所有。王武俊機謀者。料彼敵情。防其不意。閉壘清野。馳使往來。身且不與滔相見。滔亦戒嚴。秋毫無犯。軍次魏境。卒情將驕。欲有城下之意。時貝州刺史邢冑俊。武勇絕倫。英威自若。勵兵秣馬。固敵是求。朱滔圍城。日夜攻戰。時武俊致書於昭義。魏博等書曰。自古通賢。見機而作。主上明明。二百年之令主。宗枝百代。帝子帝孫。吾徒頃因讒臣罔上。觸藩之際。遂懼傾危。拒境抗兵。偷存瞬息。今朱泚竊據于宮闕。朱滔長驅于河北。聖上巡狩于畿甸。希烈侏張于淮楚。昔班彪之智。知漢祚之未衰。馬援書生。識光武之可輔。今請轉禍爲福。以過爲功。戮力勤王。共匡時難。牒昭義。魏博。滄景等州。卽請部署。四鎮齊驅。魏博擊其前。滄景掩其後。易定乘其左。昭義奪其右。掃蕩妖孽。廓清寰宇。然後奉表紫宸。獻書北闕。榮家榮國。豈不休哉。諸軍得書。各進表行在。有詔令魏。冀。昭義。進軍擊朱滔也。諸將受詔。各遂攻敵。武俊謂二將曰。僕才非廉藺。今遇時來。請效先鋒。請勒轡一觀成敗。二將勒兵據險。爲武俊軍援。朱滔與武俊自辰交兵。至于午未之間。氣色兩衰。武俊爲流矢所中。遂各抽軍歸營。壘。武俊謂二將曰。軍勢兩衰。各請騎士。昭義。相。魏各率精騎五千。昭義節度李抱眞。使馬軍兵馬使御史大夫來皓爲軍正。皓謂三軍曰。今以騎士一鼓而摧之。其勢必敗。賊營若動。便請三軍齊驅。如覆巢之破。

卯百戰百勝之謀也。曉示訖，皓領三軍騎士一萬，當鋒而衝之。乍聚乍散，軍勢彌盛，賊恍惚莫測其算。且武俊伏兵要害，李抱真使行軍司馬盧元真勒兵一萬襲其營壘。滔聞後軍有變，左右顧望，軍勢不安。遂抽軍奔壘，軍勢亦動。被王師追逐，軍遂大潰，棄甲而遁。武俊伏兵邀之，誅斬略盡三十萬之突騎。隨霜劍而星飛，數百里之浮屍，有長平之冤氣。朱滔挺身奔于幽州，天喪渠魁，遂發背而死於戲。天道惡盈，其朱滔之謂乎？于是河北諸帥獻書行在，悉爲王臣。皇恩普密，咸蒙洗雪。詩云：我徒我御，我師我旅。我行旣集，蓋云歸處。初，田悅叛王命，有表請貸絹八萬疋，賜贖三軍。此爲不道之萌矣。聖上以天監孔明，無幽不燭，謂悅使者曰：君臣父子，義無貸假。四海之內，皆是我家。日月所照，悉爲臣妾。卿彼將士，卽朕股肱。若信貸便，切傷物議。今遣將絹八萬疋，以充三軍斗酒之貺，便令宣示。曉諭三軍，三軍愕然，知有逆順。田悅不遂其謀，矯詐遂息。旋因于紹，令狐暉、鮮于叔明等上封事，揀練僧道，恩制旣行，宣示天下。田悅因此得展逆謀，僞稱恩制，揀點三軍。老人中人已下，多怨謗焉。田悅調說三軍，拒我王命，全軍圍我臨洛，守將張丕練卒三千，堅壁深壘，號令嚴肅，甘苦皆同。吏士莫不效其死節。圍經五月，糧儲罄竭，賊圍不解。丕先出私家牛馬，用充軍食，莫不感激焉。乾牛葦弓，並充軍食。易子析骸，亦已甚矣。時太原昭義、河陽並頓軍于狗明二山。時田悅壁壘嚴肅，馬公不果前進。問鄉老曰：按圖經，此山有名否？鄉老曰：一名明山，一名狗山。公曰：卽此頓軍必勝之地。爲田悅是兔相也，不已糧竭，計無所出。晨夜舉火，與馬相公相應。飛書不遂，有東風形勢甚便，遂作紙老鴟而致書焉。直放上高數百尺，風勢愈急，直上至馬公中營。田悅命善射者數人射

之不及焉。公三軍大叫呼擊鼓迎之。馬公得書書意甚急。如三日內不救全軍必陷。馬遂奔洺州。馬公與諸軍進圍洺水。于城西南列三大營。悅自洺州拔歸。南至頓丘縣也。李懷光返旆。解奉天重圍。實救雁門之急。功無與議也。然而大駕再遷。亦懷光之返覆也。嗟乎。火焚昆山。玉石同燼。阻兵頡頏。臣節遂虧。功高太山。而不能守名。參伊呂。而不能全。何終始之不一也。懷光既招朝議。自居反側。降吳不可。歸蜀無路。謂三軍曰。吾進無王。翦益兵之過。退無李。廣失利之憊。吾心惟勤王。而聖主見疑。錫之鐵券。吾騎虎捻耳。倚鹿是困。自古列地封王。各爲盟主。今是時也。吾觀兵河中。晉之舊壤。秣馬訓士。以候天時。看其形勢。見機而取之。卞莊子刺虎之事也。不亦休哉。軍吏大呼。春三月。拔咸陽。掠三原等十二縣。雞犬無遺。老少步騎百餘萬。時上幸梁洋。關中四鎮各屯兵戒嚴。自固封境。更相疑阻。莫知適從。時檢校右僕射李公晟。以懷光進軍于東北。李公戒嚴于西南。以卒五千。廣張旗幟。列陣于澧水之陽。灞水之陰。遊騎至于望春樓下。朱泚閉壘而守。不敢枝梧。李公又使大將御史大夫莫仁擢。以步兵七千襲懷光輜重。騎將陽重問等五千餘人。悉來款附。李公謂諸將曰。公等久著勤勞。有垂成之功。太尉忽乖臣節。何也。公等若執迷不返。則功勞併棄。顛而不扶。焉用彼相。龜玉之毀。誰之過歟。用兵之害。猶預爲大。合殺不殺。天賊乃發。誠能見機。轉禍爲福。諒可嘉也。請去械器。方表素心。諸將士等喜躍。並棄戈矛。器仗山積。以禮見。李招集叛亡之士。收募豪傑。軍容日盛。關中四鎮。知忠義而歸附也。則東北之役。不戰而成。功。西南靈旗。醜虜而喪魄。斷二兇之勢。不敢相附。皆李公之謀也。詩云。赳赳武夫。公侯腹心。以二兇之間。兩面受敵。遂密表行在。論懷

光不臣之狀。陳孤軍腹背用軍之謀。臣請死節王事。願陛下天威遠借。死日生年。臣之願也。上覽表。潸然謂公使者曰。晉帝北伐。劉元海公私軍乘以從行役。麴三十餅以充御食。尋覽史冊。莫不潸然爲之流涕。朕今此行。備嘗斯苦。卿獨存臣節。無物申得朕懷。今將先帝血脈。與卿爲信。悉朕深意。卿其勉之。遂翦髮方寸。付公使者。使者將命。具宣聖旨。公舉身自撲。濺血灑地。三軍慟哭。山震獸驚。陣雲橫衝。魚躍而沸。涓將士拔距爭效死節。公謂三軍曰。昔逢蒙善射。弓不調而不射。英起善戰。兵不教而不戰。今饗士練師。然後可用。夫中國者。天地之秀氣也。明主之所化也。聖賢之所聚也。千官跼蹐。百辟翼翼。皇王行幸。爲賊所乘。周鼎未輕。臣死君難。司馬公之食汝。只在今日。平原君之好客。終聞穎脫。公精勇感人。神雄略出天地。義聲一吐。威名振于賊庭。號令旣行。逆命懸于鬼錄。三軍賈勇。若赴私讎。公知士卒可用。以行軍司馬鄭雲達爲軍正。察軍情焉。用張彧侍郎爲都知糧料。使知轉輸焉。軍師孟日華。王賁等爲心膂。菟乘補卒。各有司存焉。軍容大盛。與亞夫柳營各一時也。坊州刺史竇覲。徵召百姓防城。擬充行役。管內鐵鐘鑄爲戎器。監者盜其鐘鐵。用充鑄鑄。及鑄成。而作鐘鳴響。人謂之妖怪。遂聞其州縣。鞫問其故。乃鐘鐵也。覲自村爲發機之首。遂取鑄置于淨室。焚香禮拜供養焉。是時蔡人縱兵。已下汴州。遂有吞江淮之志。三吳股慄。其遊騎達于襄邑縣。宣武軍先鋒寧陵襄邑兩城都知兵馬使兼御史中丞高翼。統卒一萬。固守襄邑。有轉輸之粟。利器山積。爲賊所乘。不踰旬日。軍敗城陷。戎裝委粟。悉爲盜資矣。襄邑爲蔡人所有。高翼有勇無謀。不思孟明之敗。遂憤惋投河而卒。君子曰。夫綆短者不可以汲深。智小者不可以謀大。斯言信矣。蔡

人僥倖遂欲長驅自謂莫敢有爭衡者時都統副使右僕射兼御史大夫宋亳節度劉公洽幽隴兵馬使御史大夫曲環淄青兵馬使御史大夫李克信并永平同華等軍有詔以劉公爲都統諸軍事五軍步騎十五萬大會決戰于沛水之陽白塔之地自辰至于申酉之間勝負相半賊益生兵我師不利夜後抽軍各不相救都統劉公宵迷細柳縱騎奔于敵營也去賊稍近步卒恆少清謂劉公曰僕射是萬里長城國家天柱軍有先虛而後實今少有不利用縱騎奔敵以恐度之恐非計也使逼劉公而控其轡劉公謂少清曰若審爾者終不相負假我戎器意乃決也少清以戎器授于劉公遂控轡而迺三更達于宋州劉公收集離散保守城池秣馬厲兵以俟後舉孟夏之月蔡人有白塔之捷縱兵攻寧陵自襄邑達于寧陵路經七十里外水陸荐至樓船河中魚貫相次步騎兩岸蝟毛蜂起蔡人驍捷自謂功在頃刻時寧陵兩城都知鎮遏使兼御史中丞高彥昭宣武軍馬步都虞候先鋒救援兵馬使兼御史中丞劉昌御史端公張昌等築壘清野秣馬訓兵憤氣填胸誓雪國恥蔡人恃衆攻逼城邑自秦漢出師攻戰之具未足比也公皆禦之九攻九拒百戰百勝元兇使道術之士置土壇祈諸風伯乘風放火焚蒸戰棚凡數百里間烟燄衝然風勢踰急兇徒順風上城攻掘女牆百堵皆盡戰士多難之高公按劍登陴而望之見兇醜方盛將士不安乃仰天而歎曰今逆豎馮陵兇威轉甚皇天后土豈無靈應者哉昔呂光伐龜茲也尙感神獸呈質而軍師大興宋祖之伐慕容蒼鵝入幕今仗皇天之威爲國除殘去害若運數有終彥昭請死于此城以勵臣節如其國祚再昌請上天降鑒便請迴風知神聖之幽贊也言訖而風迴三軍賈勇請求死鬪女牆

高處。公令旋立木棚。與賊交鋒。狂虜奸謀。一夕萬變。公皆隨而應之。棚上烏衣者。如光武之鷓路焉。時中丞劉昌潛謂左右曰。乘勝之軍不可敵。況彼衆我寡。倍兵不戰。軍機所誠。不如拔城以示弱。東至宋州。與僕射連轡。出其不意。功必易成。遂令廝養之卒策騎而備焉。高公知之。敕諸守領各固封界。無令失機。遂自往城下。先謂公曰。頃爲女牆戰棚。未得用機。今戰棚已燒。女牆又盡。乃可展其方略也。天下功勳。在此城取之。劉公有所懼。強請高公曰。淮節昌取之。中丞勳業。何啻淮西也。二將言訖。高公登城。號令三軍。劉中丞意欲拔城示弱。覆而取之。且中丞是救援之軍。彥昭是兩城之主。得失只在城主人。將士身中刀箭者。並于城內養之。彥昭棄城而遁。則傷者死于內。逃者死于外。何以能安三軍。忝與兒郎爲主。不能堅守城池。忍遣兒郎頸犯白刃。吾不爲也。且軍令在和不在衆。謀主在德不在勇。商周之不敵也。昔謝安石以羸兵七萬。敗苻秦百萬之師。魯姑女子之義。尙能罷齊軍之衆。況丈夫食人之祿。死人之事。匪石之心。確乎不拔。臣節有在。三軍將士。或號或泣。喜躍兼并。咸曰。我公若在。兒郎等死日生年。于是距躍曲踊。請求死戰。自此已前。分番上城。更直巡探。自此之後。並皆上城。三軍同心。萬人一德。劉公見公。色多媿赧。高公諭曰。昔賢之用兵也。任賢才。布德政。不戰而勝。不攻而取。今之用兵也。尙奇策。重權謀。守必全。戰必勝。今以國步未清。皇上巡狩。大盜移都。且須散金帛。犒師旅。使聞鼓而蹈湯。赴火。聞金而星布雲合。賞給之備。請中丞條疏。城外小虜。不足爲慮。時圍益急。西北角女牆悉盡。賊居平坐。顧視城中。無不委悉。軍士皆有難色。高公精貫白日。神情自若。謂三軍曰。今是壯士封侯之始。忠臣效節之秋。明主立賞以待賢。懸爵以

錫功彥昭請身先士卒有異議者當按軍令言訖按劍前進慷慨咄嗟畏我忠誠賊軍稍解高公取私家牛馬大會將士肉山酒地三軍皆醉高公爲三禮之將戰士爲萬死之人天下安危寄在茲日賊雖小退兵衆尙強高公命幕佐修狀請益兵判官尙華狀稱賊于西北壘道更高左擊右攻平視城內日夜交戰以棚爲牆鋒刃相持不踰咫尺伏惟僕射去食存信救此孤城遊魂之年返骸之日謹錄狀上伏聽處分判官將呈高公見之謂尙華曰判官輕我軍士卑我將帥若值六國爭衡吾則與廉藺齊驅如逢佐漢開基吾則與韓彭並進今城外小虜可以權道取之尙華未盡深意焉得壯彼兇威易我王師乎索紙自修其狀高公狀云看此賊勢朝夕西遁以今月十八十九日頻日出師乘其不意生擒大將等三十五人今見所令由錮身送上斬首三千二百級賊徒膽破軍勢不安逃遁有跡日夜枝梧免落奸便伏惟高枕不用遠憂謹錄狀上劉僕射得狀忻然慰懷謂將士曰良將在西吾無患矣選驍雄之士八百人重加錫賚戎械鮮潔令赴寧陵半夜而入蔡人不知平明蔡人逼我城邑且貔虎之士一以抗百鞞鼓一振萬矢在弦鳴笛一吹千弩齊發兇徒瓦解何牧野之類焉遍野積屍豈昆陽之可匹蔡人謂我救軍從天上來遂亡旗而遁高公練其騎士追之俘斬萬計自寧陵至于襄邑樓船寶貝悉爲我有倉庾輜重實我資糧汴河之陰枕屍數十里皆高公義勇之功也時劉公書與高公勞之曰宣武者天下咽喉國家之襟帶元兇傑逆竊弄神器治與五軍大戰幾落奸便走馬奔馳分爲擒虜昔燕昭王收燕之餘人欲報齊雪先人之恥折節下士卒招賢俊築壇拜郭隗爲師于是樂毅自魏而來燕國旣安人民樂爲用也樂毅爲上將軍

糾合諸侯共伐齊。下其七十城。今洽爲國除殘去害。天借賊機。官軍不振。賴中丞異代間生。夷兇翦暴。心貫白日。功高一時。請迴洽官爵。並與中丞事。寧劉公表奏焉。詔拜公御史大夫。實封一百五十戶。公英謀獨斷。爲天下紀綱。武略雄圖。有濟時之策。變化在乎方寸。神鬼不測奇謀。拔濮陽則齊魯亡魂。守寧陵城則獨正王室。趙魏燕齊之烈將。并來款附。嗚呼。天降兇孽。禍亂相尋。蚊蟲亂飛。處處皆有。高公獨守孤城。奮不顧命。徘徊歎息。嗟漢祚之暫衰。慷慨懷忠。知唐運之復振。烈士臨難而盡節。忠臣見危而致命。力竭弓劍。血毀朱輪。杖戰咄嗟。懦夫增勇。積屍成觀。豈寧陵之足高。流血成池。嫌怵河之不廣。元兇遁走。江淮又安。千載之後。尋唐良臣傳。知高公盛德之不朽也。何必寇恂河內。鄼侯關中而已哉。夫子曰。丹漆不文。白玉不雕。質有餘也。公之元勳碩德。幻思奇謀。隨機應敵。戰必勝。守必全。寔曠代罕儔也。時壽州刺史御史張建封。總師五千屯于霍丘。時希烈兵威大盛。一戰而伯儀棄甲。再戰而哥舒拔城。大梁雄藩。不暇自守。惟楊巨防屢申款附。公用軫于懷。謂三軍將士曰。今大盜移國。京師不守。公私塗炭。皇帝蒙塵。未見申包胥慟哭于秦庭。但見姚令言稱兵于肘腋。希烈屢勝。勝則必驕。驕則可圖也。軍雖小。仗順可立大功。在于此時也。公雖外示威武。而內攻守之計。未知所出。百姓李通。耽翫之士也。聞之。謂子弟曰。吾聞君侯勳庸久著。才業甚高。衆所具瞻。遠近景慕。今以西鄰傑逆。密邇封疆。有勤王報國之心。無曹劌。蒯通獻奇之士。于是策蹇足。造軍門。請謁于公。將吏問其故。通以情告。謁者乃見之。公謂通曰。來我轅門。有異見乎。曰。然。公曰。子試言之。通曰。昔沛公拔足揮洗。元德三請亮廬。韓信請計于左車。此數者。求賢之謂也。夫決安

危之策。定禍亂之計。佐造化之功。覽英雄之志。除天下之禍。議萬全之計。不在思賢而在知賢。今天下安危。在于淮楚。師律振則三吳安。三吳安則國家不失外府。君侯卽宜收集子弟。禮遇豪傑。閱子房黃石之書。披淳風衛公之術。奪賊馬以益騎。收賊糧以益儲。殄滅元兇。致君堯舜。若不然。則閉壁深壘。按甲養兵。自保封疆。外假英雄。內修文德。見可而進。知難而退。如是縱不能收馬申蔡。豈使虜入封境哉。張公曰。子少止。吾知之。夫兵者。兇器也。聖人不得已而用之。又曰。聚兵十萬。日費千金。又曰。師克在和不在衆。昔者李陵提步卒五千。深入絕漠。當單于莫量之衆。吾今兵數不減于陵矣。賊又擅帝王之號。假諸侯之力。已下襄陽。而令若秋霜。盡歸本鎮。而飛走無遺。殺戮不辜。過于赤眉黃巾矣。及攻州郡。剝喪黎元。塗炭士女。奪人之妻。離人之親。劫人之財。孤人之子。王孫之室。翻爲原憲之貧。糜竺之家。乃作鄧通之鬼。天怒神怨。此可取乎。今當圖萬全之計。不知一戰之策也。張公深識遠慮。潛圖密謀。人所不測也。知本道必有與賊通好之事。賊必有往來傳命之使。欲因斬之。以建功業。大興師旅。以成其勳。是以匿銳沉精。通不之知也。未幾。本道揚州節度司徒陳少遊。見元兇兵威日盛。謂三軍將士曰。揚楚之人。故多怯懦。淮寧兇勇。難與爭鋒。今可以權計羈縻。而取遂表行在。使討擊副使溫術。□于元兇。途出壽陽。張公知之。乃繫術于官舍。而搜其行從。果獲款狀。使使上進。有詔追術。帝親問其故。溫術雖卽言之。猶爲魯諱。帝謂術曰。張建封據一州之地。馳半縣之卒。當賊大衝。少遊居維揚雄藩。脂膏之地。十萬之師。吟嘯可致。竇融河西之節。應爲漢網疎也。帝居行在。且復舍垢而已。尋元兇使僞殿前散將兼衙前虞候楊豐。送僞赦書于揚州。張公察

知而獲之。乃集三軍將士。百姓士庶等。謂之曰。李希烈起自戎行。驟遷台鼎。素無才行。偶遇時來。而不能思致身之所。敢肆滔天之禍。物極則返。木禿則摧。不守窟穴。恣其非望。楊豐敢與兇謀。搆我節使。昔漢將寇恂。斬隗囂使而下其城。今是時也。斬豐而表聞。帝覽表大悅。加公御史大夫。廬濠壽等州都團練觀察。處置使。敕書手詔。繼踵而至。軍聲大振。公于是敝大幕。立義旗。賞英賢。練士馬。大豪俊傑。爭來效節。公皆隨其才而用之。君子小人咸盡其能。幕府無遺才矣。遠近向慕。元兇懾氣。將士皆樂死戰。公乃蒐三軍之實。聽輿人之頌。少長有禮。知其可用也。元兇北下。汴州東破襄邑。全師攻逗寧陵。土山壘道。瞰臨城內。公乃悉銳躡其後。師次固始。賊顧望寧陵。返旆至于大梁。不敢安席。席卷南馳。以赴固始之急。張公既解寧陵之圍。復全軍歸保于霍丘。所謂見可而進。知難而退。武之善經也。既而飲至策勳。慶賞遂行。無不忻然。元兇自此不得其志。汴州覆敗後。尋亦憤恚而卒。詔拜公檢校右僕射。兼徐泗濠節度觀察處置使。錫賚繼至。御札盈箱。其見寵遇如此。

上初拔奉天。而車駕至宜壽縣北渭水之陽。謂侍臣曰。朕之此行。莫同永嘉之勢。因潛然流涕。時工部尙書渾公彝。對曰。易稱先號咷而後笑。素王之至言。肅宗幸靈武。代宗幸陝郡。尼父遭匡人之難。絃歌不輟其聲。故曰。臨大難而無憂懼者。聖人之勇也。言訖濟河。六師巡狩。駕次駱谷。青山有八十四頭盤。直上千仞。山勢崿嶷。攀蘿登陟。見蓬萊之遠岫。遙望五峯。似一拳之培塿。山頂無草木。直下望烟霞。時聞春鶯關關。往往山鳥叫嘯。日旰萬乘思食。前路尙遙。躊躇之間。忽有一徑。不容乘騎。人可纔通。循此而行。過

數百步。忽見僧房嚴肅。廊宇清閑。石砌散花。金鋪耀日。彩素丹牒。樓殿遍谿。寶鐸喧空。和鈴雜吹。地逾高勝。境界難思。池沼澄虛。下含煙霧。異果呈實。殊香滿空。千葉蓮開。萬年花發。芬芳菌萑。相映林泉。又見老僧年踰八十。貌古神秀。氣清體閑。先驅稽首。謂老僧曰。皇帝巡狩。路阻崎嶇。谿谷萬里。杉松拂漢。修途尙賒。日旰須食。帝將憩駕。御膳如何。老僧曰。聖人行幸。迴駕在近。左右扈從。其數幾何。先驅曰。若在路從。駕其數莫量。今在左右。纔有千數。老僧曰。千數之膳。何足介意。先驅見山中人物既少。慮難修辦。老僧心知。謂先驅曰。昔左慈術士也。尙卮酒升脯。犒勞三軍。醉飽。況香積之飯。戒定慧之薰修。百萬人天。尙猶不盡。況乎一千人數。胡足爲多矣。于是飯瑩珠光。羹鮮玉液。明踰麗雪。香奪芳蘭。扈從千人。無不飽足。聖人憩駕。歡情見容。心思聖言。再忻再躍。食此飯者。身安體輕。皮光色潤。知是聖人無作。作則感動天地。靈祇百應。口是忘機。自然而至也。老僧曰。山中小徑。路僻人稀。山頂孤峰。惟聞猿嘯。清風明月。空伴經行之時。流水行雲。豈知坐禪之劫。聖上迴駕。尋路南征。俄忽之間。迴首返顧。但見空山萬仞。石壁千尋。草木不生。罕逢人跡。皇帝倍生驚異焉。遂向山稽首而言曰。朕知諸佛聖化也。國祚之所恃。蒼生之所仰。願朕早尅京師。天下通流。必無留難。言訖。循此數百步。南望漢江。仲春草青。俯臨綠水。目送歸鳥。心懷漢宮。皇帝潛然。不覺揮涕。百官扈從。強笑含哭。從此南行。不過三五里。卽入崆峒之谷。直下萬尋。風水潺湲。似鳴琴之逸韻。雲蘿翳鬱。狀仙洞之幽棲。石壁紅崖。自然錦障。猿聲鶴唳。過客傷心。于是三秦遺老。雪涕而望。乘輿行路。咨嗟相視。而思漢德。趙魏之將。返旆而討。賊臣。恆冀諸侯。攜手而歸。德化三吳。三楚。稽首而捧綸言。三

蜀三秦。罄節而宣王命。駕次漢中。洋梁節度嚴振。草創朝廷。盡忠社稷。位兼中外。銓敍羣材。行在肅然。遠近忻慕。四方貢賦。如百川之奔東海也。南方士庶。如岐陽之輻輳焉。上以僞號未翦。志復中原。盡禮接垂釣之賓。罄恩感拔山之將。皇帝曰。萬方有罪。責在朕躬。今社稷不守。播在山谷。緬思七廟無主。八陵絕響。莫不痛心疾首。今須擇名將。揀良臣。授鉞專征。誰可任者。朝廷衆議。以工部尚書渾公可充此役。乃擇日齋戒。設壇場。皇帝先居正位。渾公北面而立。帝親操鉞授公曰。上至于天下。至于泉。將軍制之。勿以受命重而死。勿以怯退而喪軀。審候敵情。善觀時變。務在全軍濟衆。順天除害。公乃卜吉日。備軍儀。鑿凶門而出師。帝自推轂。乃辭而行。是日軍中之事。不聞天子詔。但聽將軍令。介冑之士。愕然相謂曰。萬國蒼生之命。懸于將軍矣。渾公身擐黃金甲。領步騎三萬。從邪谷出師。李楚琳雖與朱泚通好。畏我奇謀。不敢出戰。渾公自渭橋。口水之陽。引師東上。至武功縣。會泚以步騎四千人。玉帛三千馱。自長安而來。欲往鳳翔。涇原充三軍結好。共拒天命。會公于武亭之川。泚卒素豐金帛。先來挑戰。渾公以士馬遠來。未可遂抽軍于武功。西陂下營。以挫其銳氣。渾公先與羌軍和好。使其遊騎引之。取路于東原而入。渾公自將麾下。從西陂而進。合勢蹙之。賊軍大敗。斬獲殆盡。積屍填谷。白渠水咽而不流。驍卒四千。一無遺脫。所獲金帛。並充軍賞。給禮而退之。公一無所取。然後引軍入奉天城。移牒諸道。渭北。靈鹽。邠寧。涇原。鳳翔。等諸道。繼至。中原尅復。自此而始。詩云。原隰既清。邵伯有成。王心則寧。又曰。剛亦不吐。柔亦不茹。其渾公之謂矣。

奉天錄卷四

夏五月二十有八日。右僕射李公晟。金商節度尙可孤。同華節度駱元光。神策制將高秉哲。潼關大使御史大夫唐朝臣等。自東渭橋至終南山。百有餘里。南北布兵。騎士行列。前後如魚鱗焉。李公從苑東北角。壞垣而入。泚不之覺。泚用張光晟爲門下平章事。委以心膂。光晟勢窮。因爲內應。李公縱騎。至于白花殿。泚方知官軍大入。泚不敢枝梧。策馬而遁。李公搜索宮苑。殄掃羣兇。然後使之號令。都人不知。軍令肅如也。渾公使河東節度兵馬使王權。從中渭橋而入。公與李公建徽。韓遊瓌。戴休顏。張憲甫等。西至茂陵。東至周市坡。夜半下營。遲明就路。逮乎日出。連騎齊驅。朱旗燄天。元甲鱗地。咸陽孤城。一舉而下。渾公使先鋒遊騎。東入長安。然後大軍繼至。與李公同梟兇黨。先鋒至三橋。逢李公使者。賈牒與渾公。令取北路。追泚。渾公却入咸陽。與諸將計會。諸將皆云。李公使者從東面收城。國家金帛寶貝。三軍豐足。而我諸軍。跋涉山川。侍衛乘輿。草創建朝廷。返旆破殘賊。李公下長安。賴我武功之捷。李公不自追賊。移牒北軍。是輕我也。且爭名于朝。爭利于市。見機不取。更欲何爲。且李公士馬不過十五萬。金帛旣豐。必有驕我之色。宮苑綵女。悉爲僕妾。各自顧金帛。守妻子。誰爲戰者。今我此軍。且有朔方神策。幽隴宿衛。不下二十萬。若卷旗而取之。如餓狼之逐跛兔。鷹隼之擒困雀也。騏驥之逐駑駘也。今若不取。後難圖也。渾公愕然而謂三軍曰。將士徒知其一。不知其二。昔蘭相如。駐車避廉頗。分路而行。車下之人。請歸穡養。相如問其故。對曰。

臣聞主憂臣辱。主辱臣死。今相府避路廉頗。有不強之色。臣下無依。請歸田里。相如謂從者曰。廉頗威武。猛勇。何如秦昭王曰。不如也。相如曰。吾尚不懼秦昭王。豈難于廉頗耳。今諸侯不敢加兵于趙者。爲吾與廉頗。若我與廉頗相得失。勢不兩全。諸侯乘危而進軍。趙必危矣。吾之避路。爲趙國社稷。非難于廉頗也。從者曰。君子之智。非下臣所知也。遂再拜受命。廉頗聞之。負荊請罪。爲刎頸之交。吾今亦然也。吾有保衛之功。亦神理之不昧。李公抗二兇之勢。亦有莫大之功。今蔡人竊號于梁國。懷光不賓于晉府。聖主巡幸而未返。楚琳伺隙而進軍。懷光得志于蒲晉。希烈浸淫于河洛。齊魏抗兵于封境。卽人臣道喪。聖主何安。根本未寧。枝葉何寄。吾用是勤王志存社稷。上在奉天。功成將士優賞至高。足豐其用。公等父母妻子。並在長安。今若與馳逐。則白刃之下。孰辨賢良。黃塵之中。寧分貴賤。崑山縱火。玉石俱焚。霜飛上林。芳蘭同殞。流血積屍之地。寧分父母之容。千軍萬馬之下。孰察妻孥之狀。公等血屬。豈不殆哉。今若戮力同心。共成王事。誅斬兇黨。獻捷王朝。子孫榮慶于前。恩光更流于後。豈不休哉。三軍將士曰。君子所幸。小人之不幸也。非臣下之所知也。敬奉命引師西上。朱泚奔西戎。至寧州官屯。從者梟首。送于漢中。渾公擁節。與諸將返旆迎駕。而歸于國都也。孔子曰。功被天下。守之以讓。勇力振代。守之以怯。詩云。知我者謂我心憂。不知我者謂我何求。又曰。哀我人斯。亦恐之將。豈不然乎。李公晟電掃關中。機槍已滅。風行艸靡。車軌攸同。兇黨伏誅。枝葉皆盡。逆人之迹。並令削除。天府神都。咸稱萬歲。李公軍政鄭雲達。時爲行軍司馬。收長安。爲前驅焉。畜銳披堅。拔距摧敵。上知文武絕倫。深謀邁古。屢有詔旨。寵錫殊常。初收京師。搜獲宮殿。斬決。

解補皇城留後灑掃禁衛如此等使踰三旬焉。車駕歸復京師。尋遷給事中。衛尉卿兵部侍郎度支副使公文武上才。聲名籍甚。執事不平之。令公朝堂謂諸執事曰。晟有渭橋之捷。並是鄭雲達之功。今天下無爲。方欲指陳得失。莫見皇帝還京。有乖雅意。憂懼茫然。惟稱不敢。其見推之功如此。張彧侍郎。令公之子壻也。見機之士也。請固守渭橋倉。轉輸諸軍糧儲有繼。祕略佐元勳。忠誠決命。贊令公義勇。參佐幃幄。大興王師。掃清宮掖。可謂佐略之雄也。王賁侍郎。卽令公之宅相也。志大氣雄。酷似其舅。佐渭陽而主定大業。功冠乎時。統師旅而雄勇絕倫。忠義宏代。累受詔旨。誰曰不然。立事立功。是崇台鼎。可謂大丈夫處其厚而不處其薄矣。軍師孟日華。膽勇殊倫。謀猷罕匹。以戰必勝。所謂與王以守必全。所謂寧國七擒七縱。深知敵情。負載前驅。當鋒瓦解。帝嘉其誠節。寵錫殊常。尋拜工部尙書。渥恩屢至。可謂中興之良將也。令公輔天地。正星辰。實此四公之力也。雖古用賢。不啻過也。令公崇重刑法。不貸。時僞門下平章事張光晟。恃內應之功。辭公先往迎駕。擬立功于衆臣之上。李公知其姦詐。乃集三軍而讓之曰。君子蹈道以全身。小人反是以伺隙。吾聞忠不惡君。智不叛上。勇不逃死。光晟且同謀不終其義。佐漢又非純臣。事迫勢窮。返噬其主。晟方掃除妖孽。洗滌宮闈。四兇碎首于王階。三苗屏除于天外。光晟返覆其君。亂我邦國。將付大戮。以戒將來。豈可使首鼠豎子。與我同天乎。付都虞候賜之極刑。光晟臨死而言曰。傳語後人。第一莫作第二莫休。此乃賊臣之詞。君子曰。神謀祕算。豈昔智而今愚。俱爲漢臣。何前忠而後亂。二心事主。豫讓之不爲。三思而行。季孫之善志。李公一清宮掖。德比伊周。再殄兇渠。功超衛霍。社稷立宗廟安。命有記言。

之官百司不紊。表奏行在。詔命公自苑圍畿甸。皇城諸鎮。各量功補授。其廊廟資格。制于行在。工部尙書。渾公自下咸陽。追捕逆黨。與四鎮節度迎駕于洋梁。大駕還京。威儀輦轂。前後部伍。兼四鎮六軍。神策威遠。並渾公爲總政。而歸于長安也。詩云。周雖舊邦。其命維新。又云。厥德不回。以受方國。渾公有焉。皇帝發自南朝。來歸鳳闕。雨師洒潤。風伯清塵。玉柱金繩。御路星布。金吾六軍。神策四鎮。三台八座。九寺公卿。十二衛將軍。省閣郎署。先驅後殿。旌旗蔽野。雅樂喧空。麗日披雲。綠山被谷。駕次陳倉縣。鳳翔節度李楚琳。與九縣官吏耆老等五千餘人。拜舞于上前。上令中使宣勞官吏耆老等。楚琳一無所問。以其貳于我也。初。楚琳與張鎰腹心。見泚僭僞。遂賊殺鎰而歸泚。泚授楚琳鳳翔節度。泚攻奉天。楚琳供應。及李懷光救援。軍次涇陽。泚卻守長安。楚琳勢窮。遂進節奉天。帝不悅。命左右焚之。卽欲口議。上以天步猶阻。含垢匿瑕。且爲容忍。遂發使賜楚琳節。羈縻而取之。後懷光阻兵。帝幸洋梁。楚琳又與泚通耗。帝聞深不平。皇帝還京。楚琳從駕至長安。詔授右衛將軍。表請出家。有詔依請。遂不得志。愁憤而卒。上至咸陽縣。李公以金商同華神策等軍馬。自丹鳳橋至于便門。六十餘里。御路兩旁。前後魚貫。錦繡交錯。朱紫相輝。鐵馬排空。霜戈曜日。工部尙書渾公。嗣鄒王寓。京城都防城使侯仲莊。靈鹽節度杜希全。渭北節度李建徽。駙馬都尉郭曖。邠寧節度韓遊瓌。羽林軍使令狐建。金吾將軍論惟明等五十餘人。並是柳營上將。麟閣功臣。爲前驅焉。上發自咸陽縣。都人士女。僧道耆老。兆庶迎駕于路。寶幢幡蓋。金鑪輦轎。排空塞野。駕至三橋。中書令李公。與同華節度駱元光。金商節度尙可孤。潼關節度御史大夫唐朝臣。神策制將高秉哲等。奉迎

于乘輿李公見上自撲于地號哭良久氣絕上亦悲不自勝詔令左右洒水救之方得蘇息自文武大臣莫不掩面雪涕李公含悲而奏曰臣在朔方與河北叛將鋒刃交馳將必清宇宙之沴氣洗乾坤之瑕垢然後返旆歸朝致君堯舜不期事在蕭牆禍生不意涇原作難朱泚亂常大駕播遷宗廟無主此則國無謀臣致有斯禍言訖哽咽舉身自撲泚血灑地億兆之衆莫不潛然孟秋月十有八日皇帝再復神都百姓衣冠或號泣或喜躍手之舞之足之蹈之如暗夜之遇明燈嬰兒之遇慈母是知龍蟠虎踞之地非蚯蚓之所居麟穴鳳巢之場豈鶴鷗之所止慶雲騰而萬方喜麗日升而六合明散寶玉以賚功臣改秦科而用漢法吳山楚岫雲霧廓清碧海滄溟波瀾肅靜文無不盡武無不甄堯風流而四海和舜雨行而萬方泰于是議封賞禮山川蒲輪結轍于幽巖茅土分封于將相皇帝巡狩知稼穡之艱難大駕親征悉軍旅之勞苦玉移荆岫陰德潛通桂復幽林芳香更遠于是御正殿率百僚降鴻恩于大赦率土大同羣生遂性然後聖上坐紫極以問政考青史以求賢千官指日以獻誠萬方重譯而來貢舊染汙俗咸與惟新雷霆息怒明煦嫗而爲心日月所臨知聖德之光大修神農之播植垂堯舜之衣裳凡在生成孰不慶幸方復責躬克讓庶績咸熙協和萬邦平章百姓察璇璣而齊七政調律呂以暢八風疏山奠川任士作貢休徵允集惟德動天書曰惟天爲大惟堯則之時太極殿前紫荊樹直下數仞偃蓋盤旋枝葉蔓延傍蔭百駟羣兕竊據磨牙噴毒物由人感其樹勁死皇帝歸復榮茂如初則知聖澤滂流恩霑草木時金吾將軍論惟明上詩曰豺狼暴宮闕拔塗凌丹墀花木久不芳羣兕亦自疑旣爲皇帝枯亦爲皇帝滋艸木尙

多感報恩。須及時。皇帝披翫久之。龍顏大悅。令中官馬欽淑宣旨慰勞。賜絹一百疋。雜綵二百段。金盤一。信宿。帝謂惟明曰。朕心卽終南之不移。卿志如寒松之不變。不惟吾荅卿勤王。別有茅土。報卿忠義。尋除渭北觀察。惟明受旨而色不暢。帝知之。謂惟明曰。卿家有諱。所以授卿此任也。惟明受詔赴任。續有詔旨。謂惟明。卿父成節。但諱成。不須諱節。尋加渭北節度兼觀察處置等使。中使繼踵。其寵遇如此。時洛陽定鼎。肅穆而禁苑生風。西漢秦宮。垂拱而神光滿室。九州八表。鼓腹而歌中興。萬姓千官。接袂而沾聖化。方且大引時望。廣樹腹心。蘭菊無遺。幽滯必舉。遠安邇肅。俗阜民康。入建諸侯。維城作鎮。渾公殄懷光而鎮河中。李公撫涇原而鎮鳳翔。然後知邦國有難。忠義挺生。則天欲崇武氏。狄公爲死諫之臣。韋庶人構禍宮闈。則劉幽求定策。臯戮安史。繼逆汾陽王。功濟乾坤。建中之孽。功臣掃定。妖沴而清帝室。美矣哉。松筠之節。經寒霜而轉秀。英雄之志。對白刃而彌堅。凌風守義。破膽墮腹。不怯平生。志伸主辱。故能使兇徒瓦解。不忘戰將之功。醜類殄殲。足表漢皇之德。美矣善矣。實社稷之臣也。

奉天錄跋

按德宗之出。錄稱十月三日。舊紀通鑑並稱丁未。則其月乙巳朔也。而紀鑑書張鎰被殺。皆隸壬子。與朱泚僭位同日。錄云六日。豈傳聞誤耶。杜希全漠谷之敗。舊逆臣傳云十一月三日。鑑云丙子。蓋十一月甲戌朔。而錄以爲十月十七。雲梯之捷。舊渾瑊逆臣二傳云十五日。紀鑑云戊子。其日正符。而錄以爲十一月。上旬。朱泚解圍。紀鑑並云癸巳。以前月丁巳合圍計之。恰合新紀三旬有六日之數。自十月十三日至十一月二十日也。舊逆臣傳作三十日。乃字畫偶譌。而錄以爲十八日。盧杞之貶。新舊紀通鑑俱書十二月壬戌。非十九日。卽二十日。而錄以爲二十五日。又失書十二月。他如王翊之誤爲王雄。高重捷之誤爲重傑。皆當以史鑑爲準。然其敘述頗詳。有足以裨史氏之闕略者。此書流傳甚尠。予得自琴川書肆中。蓋卽張氏愛日精廬藏書志所云舊抄本。略校正其譌脫處。刊之。已而又得江都秦氏新刊永樂大典本。其分卷自首至卷二。其渾公之謂乎。爲第一卷。時李懷光自魏博團練精兵至。卷三南至頓邱縣也。爲第二卷。李懷光返旆解奉天。重圍至其見寵遇如此。爲第三卷。上初拔奉天。連至末。爲第四卷。與抄本句字不同。擇其善者從之。兩通者不能一一刊改。秦刻世有單行本。宜合參之云。癸卯六月朔。錫之甫跋。

奉天錄校勘表

卷	次	頁	次	行	次	指	海	本	粵	雅	本
序		第一	頁	三	行	普六氏平陳國			氏作茹		
卷	一	第三	頁	一	行	傳食而過			食作食		
卷	一	第三	頁	四	行	先與宮主失意上收宮主 在內			宮並作公		
卷	一	第三	頁	五	行	三日夜四更至洛驛			洛作駱		
卷	一	第三	頁	十	行	嗣鄒王竒爲右衛大將軍			鄒作郇		
卷	一	第五	頁	二	行	與哥舒曜救援			援下有者字		
卷	一	第五	頁	六	行	行及洛驛			洛作駱		
卷	二	第十	頁	七	行	不及與諸將同語			無不字		
卷	二	第十	頁	十一	行	司徒公以軍敗失士			士作土		
卷	二	第十一	頁	六	行	貞貞之節			貞貞作忠貞		
卷	二	第十一	頁	十三	行	召善定砲者			定作走		

卷三	第二十一頁	一	行	不及焉公三軍大叫呼	焉作馬
卷三	第二十頁	十四	行	與馬相公相應	馬相公作馬公
卷三	第二十頁	十四	行	爲田悅是兔相也	爲作謂
卷三	第二十頁	八	行	以充三軍斗酒之貺	斗作牛
卷三	第二十頁	七八	行	若信貸便	便作假
卷二	第十七頁	十二	行	惟李希烈覆軍不改	軍作車
卷二	第十七頁	八	行	罪滅三軍	軍作等
卷二	第十六頁	十三	行	佶先有守財三千人	財作附
卷二	第十四頁	八	行	賊衆被靡而退	被作披
卷二	第十四頁	三	行	不能抗節棄城而遁	節作卽
卷二	第十三頁	十二	行	築壘于孔子澤城	孔作九
卷二	第十三頁	九	行	泚抽軍	泚上有及字
卷二	第十二頁	九	行	松枝亂下	枝作脂
卷二	第十二頁	四	行	戰具備諸雲梯小伎	諸作諳

卷三	第二十七頁	十四行	寶融河西之節	之作乏
卷三	第二十七頁	十三行	而搜其行從	從作旅
卷三	第二十七頁	十四行	不能收馬申蔡	收作牧
卷三	第二十六頁	十行	惟楊巨防	惟作維
卷三	第二十六頁	六行	嫌怵河之不廣	怵作汴
卷三	第二十六頁	六行	血毀朱輪杖戰咄嗟	毀作殷戰作載
卷三	第二十五頁	八行	所令	令所
卷三	第二十五頁	二行	高公爲三禮之將	禮作札
卷三	第二十三頁	四行	步卒恆少清謂劉公曰	恆作桓
卷三	第二十二頁	九行	菟乘補卒	菟作菟
卷三	第二十二頁	五行	英起善戰	英作吳
卷三	第二十一頁	十四行	醜虜而喪魄	而作以
卷三	第二十一頁	一行	馬遂奔洛州	馬下有「公見危赴難遂進軍救臨洛田悅喪師十有六七焉」二十字

卷	三	第三十頁	五六	行	勿以受命重而死	重而二字乙轉
卷	四	第三十二頁	七	行	功成將士	成作臣
卷	四	第三十二頁	十三	行	亦恐之將	恐作孔
卷	四	第三十二頁	十五	行	搜獲宮殿	搜上有去字
卷	四	第三十三頁	三	行	憂懼茫然	衆俱茫然
卷	四	第三十三頁	四	行	祕略佐元勳	無佳字
卷	四	第三十四頁	十二	行	鬪鄒王寓	鄒作郇
卷	四	第三十五頁	九	行	桂復幽林	復作覆
卷	四	第三十六頁	四	行	謂惟明	明下有同字
卷	四	第三十六頁	九	行	不怯平生	怯作恇



平巢事蹟考

撰人 不詳

本館叢書集成初編所選

學海類編及奇晉齋叢書

皆收有此書奇晉得元抄

本付梓故據以排印

平巢事蹟考

宋 撰人闕 清 平湖 陸烜訂

唐僖宗乾符元年。濮州人王仙芝作亂。聚衆數千人。起於長垣。二年五月。與其黨尙君長陷濮州。曹州冤句人黃巢聚衆應之。巢屢舉進士不第。與仙芝共販私鹽。故也。十二月。仙芝寇沂州。平盧節度使宋威請帥兵討賊。遂以爲行營招討使。仍詔諸道兵并聽處分。三年七月。宋威擊仙芝於沂州。大破之。仙芝亡去。威奏仙芝已死。縱遣諸道兵百官入賀。仙芝剽掠如故。詔忠武節度使崔安潛討之。九月。仙芝陷汝州。陽武攻鄭州。十月。攻唐鄆。遂寇淮南諸州。復攻蘄州。以書與刺史裴渥。約歛兵不戰。渥許爲之。奏官開城。延仙芝及巢入城。置酒厚贈之。表陳其狀。詔以仙芝爲左神策軍押牙。仙芝甚喜。巢大怒曰。始者共立大誓。橫行天下。今獨取官而去。使此五千餘衆安所歸乎。因毆仙芝。傷首。其衆誼論不已。仙芝遂不受命。分其衆三千餘人。從仙芝及尙君長。二千餘人。從黃巢。分道而去。四年二月。仙芝陷鄂州。巢陷郢州。七月。兵圍宋威於宋州。將軍張自勉將忠武兵七千救之。殺賊二千餘人。賊解圍遁去。宰相王鐸。慮攜欲使自勉以所將兵受威節度。宰相鄭畋以二人相疑。忿若在麾下。必爲所殺。不肯署奏。遂皆求罷。不許。十月。仙芝陷安州。十一月。招討副都監楊復光遣人說諭仙芝。芝遣尙君長等請降。宋威遣兵劫取。奏與戰。生擒以獻。復光奏君長實降。詔御史鞠之。竟不能明。遂斬君長於狗脊嶺。巢於是月陷濮州。五年正月。仙芝寇荆南。節度使楊知溫不設備。賊陷羅城。猶賦詩。山南東道節度使李福。自將救之。時有沙陀五百在襄陽。福與之

至荆門。遇賊沙陀縱騎奮擊破之。仙芝聞之。焚掠而去。死者十之四。先是鄭畋與王鐸。盧攜爭論用兵於上前。不勝。退。上奏曰。自王仙芝傲擾。崔安潛首請討之。賊不敢犯其境。又以兵授張自勉。解宋州圍。使江淮漕運流通。不輸寇手。今罷自勉。而以所將兵七千人隸宋威。威復奏加誣毀。若勅寇忽至。何以枝梧。臣請以四千人授威。餘三千人使自勉將之。守衛其境。盧攜不以為然。上不能決。畋請罷。又不從。至是。招討副使曾元裕大敗仙芝於申州。殺萬人。散遣者亦萬人。迺罷威。而以元裕為招討使。自勉副之。二月。元裕又大破仙芝於黃梅。斬之。尙讓帥餘衆歸於巢。時巢方攻亳州。未下。讓推巢為衝天大將軍。改元。署官。攻陷沂濮。掠宋汴。仙芝餘黨陷洪州。巢陷虔。吉。饒。信等州。七月。巢寇宣州。觀察使王凝拒之。巢攻城不克。乃引兵入浙東。開山路七百里。攻剽福建諸州。十月。遂陷福州。仙芝餘黨曹師雄寇掠二浙。石鏡都將董昌等討之。臨安人錢鏐以饒勇事昌為兵馬使。是年四月。鄭畋。盧攜以忿爭南詔事罷。以豆盧瑑。崔沆。同平章事。六年正月。節度使高駢遣將分道擊黃巢。大破之。巢趨廣南。先是仙芝餘黨剽掠浙西。朝廷以高駢先在天平有威名。仙芝多鄆人。故徙駢鎮浙西。至是。乃得討賊。四月。以王鐸為行營招討都統。上以羣盜為憂。鐸曰。臣在朝。不足分朝廷之憂。請自督諸將討之。鐸奏李係為副使。將精兵五萬屯潭州。係之曾孫有口才而實無勇略。鐸以其世將。故用之。九月。巢上表求廣州節度使。上命大臣議之。左僕射于琮以為廣州市舶寶貨所聚。豈可令賊得之。宰相請除巢。率府率從之。巢得告。身大怒。攻廣州。陷之。挾節度使李迢。使草表。迢曰。予代受國恩。親戚滿朝。腕可斷。表不可草。巢殺之高駢。奏請遣兵馬使張璘。將兵五千。

於彬州守險。留後王重任將兵八千於循潮二州。自將萬人於大庾嶺。趨廣州。巢必逃遁。乞勅王鐸以兵三萬壁桂永。扈管兵五千壁端州。則賊無遺類。不許。十月。徙駢淮南。十一月。巢士卒罹瘴疫死者十三四。其徒勸之北還。以圖大事。乃自桂州編筏。沿湘而下。潭州李係不敢出。巢攻陷之。其將尙讓。進逼江陵。衆號五十萬。江陵兵不滿萬。王鐸留劉漢宏江陵。自帥衆趨襄陽。漢宏大掠。北歸爲盜。巢趨襄陽。山南東道節度使劉巨容與江西招討使曹全晟合并。兵屯荆門。以拒之。賊至。巨容伏兵林中。全晟逆戰。陽敗。進之。伏發。大破之。俘斬十七八。賊渡江東走。或勸巨容窮追。巨容曰。國家善負人。有急則撫存將士。不愛官賞。事寧則棄之。或更得罪。不若留賊。以爲富貴之資。衆乃止。全晟渡江追賊。會朝廷除代。亦還。由是賊勢復振。陷鄂州。掠饒信等十五州。衆至二十萬。十一月。王鐸罷。以盧攜同平章事。初。攜書薦高駢可爲都統。至是。駢將屢破賊。乃復相攜。凡王鐸鄭畋所除帥。多易置之。廣明元年。淮南將張璠及巢戰於大雲倉。敗之。三月。盧攜奏以高駢爲都統。迺傳檄徵天下兵。且廣召募。得兵七萬。威望大振。攜病風。不能行。內仗田令孜。外倚高駢。寵遇甚厚。貨賂公行。豆盧瑑無他才。附之。崔沆時有啓陳。常爲所阻。五月。黃巢屯信州。遇疾疫。卒徒多死。張璠急擊之。克饒州。巢以金啗璠。且致書請降於高駢。駢欲誘致之。許爲之求節鉞。時昭義感化。義武等軍皆至淮南。駢恐分其功。且怨朝議有不附己者。欲賊縱橫河洛。令朝廷振聳。則從而誅之。大將畢師鐸說駢曰。妖亂百萬。所經鎮戍。若跡無人之處。今朝廷所恃者都統。破賊要害之地。唯江淮爲首。彼衆我寡。若不據津要。以擊之。北渡長淮。何以振束。中原陷覆必矣。駢駭然。卽令出軍。有呂用之者。以

左道媚駢。頗用其言。懼師鐸有功。奪己權。從容謂駢曰。明公勳業高矣。妖賊未殄。朝廷已有間言。若盪平。則威望震主。功居不賞。公安稅駕耶。爲公良畫。莫若觀釁。自求多福。駢然之。乃止。奏賊不日當平。不煩諸道兵。縱遣之。賊知之。乃告絕請戰。駢怒。令璘擊之。兵敗。璘死。其別將遂陷睦。婺兩州。勢復振。遂陷宣州。七月。自采石北渡。直抵天長。時城內主客諸軍尙十餘萬。皆良將勁兵。悉願盡力出戰。然竟不議出師。巢遂至北焉。初。巢寇廣陵。江東諸侯以駢屯數道。勁卒居將相重任。巢、江海一逋逃耳。固可折箠而擒之。及是時。方鎮莫不解體。駢上表告急。稱賊六十萬。去城無五十里。先是。攜謂駢有文武長才。若悉委以兵柄。巢不足平。及表至。人情大駭。詔書責駢。駢遂稱風痺。不復出。巢衆號十五萬。副都統曹全晷以其衆六千與之戰。頗有殺獲。以衆寡不敵。退屯泗上。以俟援軍。而駢竟不之救。賊遂擊全晷。破之。詔諸道發兵屯澠水。徐州兵過許昌。大譟。節度使薛能登城慰勞。久之方定。時忠武亦遣大將周岌詣澠水。行未遠。聞之夜還。襲殺徐卒。遂逐能。殺之。自稱留後。於是澠水之兵皆散。巢悉衆渡淮。所過不虜掠。唯取丁壯。以益兵。十月。陷中州。入潁。宋徐、堯之境。初。巢將渡淮。豆盧瑑請以天平節鉞授之。俟其至鎮。討焉。盧攜曰。盜賊無厭。雖與之節鉞。不能制其剽掠。不若急發諸道兵。扼泗州。賊旣不能入關。必還掠浙。偷生海渚耳。從之。旣而淮北相繼告急。攜稱疾不出。京師大恐。巢自稱天補大將軍。轉牒諸軍。各宜守壘。勿犯吾鋒。吾將入東都。卽至京邑。自欲問罪。無預衆人。崔沆請發關內及神策軍守潼關。上對宰相泣下。田令孜陳幸蜀之計。瑑和之上。不懌。且令發兵守潼關。令孜薦張承範等使將兵。以令孜爲都指揮。制置招討等使。巢入東都境。汝

巢把截使齊克讓收軍退保潼關。奏乞早遣糧援。上命選兩神策弩手得二千八百人。令張承範將之。巢陷東都。留守劉允章帥百官迎謁。巢入城。勞問閭里晏然。田令孜募坊市數千人以補兩軍。張承範等發京師神策軍士皆長安富家子。賂宦官竄名軍籍。厚得廩賜。未嘗更戰陣。聞當出征。父子聚泣。多以金帛雇病坊貧人代行。往往不能操兵。是日上御章信門樓臨遣之。承範進言。聞黃巢擁數十萬之衆。鼓行而西。齊克讓以飢卒萬人。依托關下。今遣臣二千餘人屯於關上。而未聞爲饋餉之計。以是觀之。臣竊寒心。願陛下趣諸道精兵。早爲繼援。上曰。卿輩第行。兵尋至矣。十二月。承範等至潼關。與克讓軍皆絕糧。黃巢軍抵關下。不見其際。呼聲振河華。克讓力戰。自午至酉。飢甚。克讓走入關。賊急攻之。承範悉力拒。賊自關左禁坑入。夾攻關。關上兵潰。王師會自殺。承範蠻服脫走。巢入華州。留其將喬鈴守之。河中王重榮請降於賊。詔以黃巢爲天平節度使。田令孜聞巢已入關。恐天子責己。乃歸罪盧攜。貶爲賓客分司。攜仰藥死。薦王徽。裴徹同平章事。鳳翔博野援兵至渭橋。見新軍衣裘溫鮮。大怒。掠之。更爲賊鄉導。以趨長安。旣入城。令孜帥神策兵五百。奉帝自金光門出。唯福。穆。澤。壽。四王及妃嬪數人從行。百官皆莫之知。晡時。賊前鋒入長安。金吾將軍張直方。帥文武數十人。迎於霸上。巢入城數日。其徒各出大掠。巢不能禁。尤憎官吏。得皆殺之。上趨略谷。鳳翔節度使鄭畋。謁于道次。請留鳳翔。上曰。朕不欲密邇巨寇。且幸與元。徵兵以圖恢復。卿可糾合鄰道。勉建大勳。畋曰。道路梗塞。奏報難通。請得便宜行事。許之。巢殺唐宗室在長安者。無遺類。自稱大齊皇帝。改元金統。唐官三品以上悉停。四品以下如故。以尙讓爲太尉。以其將碭山朱溫屯

東渭橋。豆盧瑑、崔沆、于琮、劉鄴匿民間。巢搜獲，殺之。唐德公主曰：我唐室之女，誓與于僕射俱死。賊并殺之。將作監鄭綦、庫部郎中鄭係，義不降賊，舉家自殺。張直方多納亡命，匿公卿於複壁。巢殺之。夏綏節度使諸葛爽降於巢。鄭畋還鳳翔，召將佐議討賊。皆曰：賊勢方熾，宜從容俟兵集。乃圖收復。畋曰：諸君勸畋從賊乎？因悶絕仆地，不能言。會巢使者以詔書至，監軍與之宴，樂奏將佐以下皆哭。使者怪之，幕客靳儲曰：以相公風痺不能來，故悲耳。民間聞者莫不泣。畋聞之曰：吾固知人心尙未厭唐。賊授首無日矣。乃刺指血爲表，遣使詣行在，召諸將佐，諭以逆順，皆聽命。刺血與盟，完城塹，繕器械，訓士卒，密約鄰道合兵討賊。鄰道皆許諾。時禁軍分鎮關中者尙數萬，畋使人招之，皆至。軍聲大振。巢遣人齎詔召畋，畋斬之。車駕至興元，詔諸道兵收復京師。巢遣使調發河中吏民，不勝其苦。王重榮謂衆曰：始吾屈節以紓患，今調發不已，亡無日矣。悉驅巢使者殺之。巢遣朱溫擊河中，重榮大敗之，獲糧仗四十餘船。遣使與王處存結盟，引兵營於渭北。改元中和。陳敬瑄遣兵奉迎幸成都。田令孜亦勸上上從之。二月，以王鐸同平章事，加高駢東面都統，趣討巢。道路相望，駢終不出兵。三月，朱溫陷鄧州，詔以鄭畋爲京城四面諸營都統。蕃漢將士赴難有功者，并聽以墨勅除授。畋奏以涇原節度使程宗楚爲副都統。巢遣尙讓帥衆五萬寇鳳翔。畋使司馬唐弘夫伏兵要害，自以兵數千陳於高岡。賊以畋書生，輕之，鼓行而前，伏發，大敗於龍尾陂，斬首三萬餘級。沙陀李友金入援，至絳州。刺史瞿稹謂曰：賊勢方盛，未可輕進。乃俱還代州。募兵得三萬人，皆北方雜胡，屯於崞西。獷悍暴橫，稹與友金不能制。友金誠監軍陳景思曰：吾見司徒父子勇略過人，爲衆

所服請奏天子赦其罪召以爲帥則代北之人一麾響應賊不足平也景思遣使言之詔如所請友金以五百騎迎之克用率達靺諸部萬人赴之宥州刺史拓拔思恭本黨項羌也糾合夷夏兵會鄜延節度使李孝昌同謀討賊奉天鎮使齊克儉遣使詣鄭畋求自效畋乃傳檄天下合兵討賊時天子在蜀詔令不通天下謂朝廷不能復振及得畋檄爭發兵應之賊懼不敢復窺京西諸道并四夷貢獻行在不絕蜀中府庫充實賞賜不乏士卒欣悅四月唐弘夫屯渭北王重榮屯沙陀王處存屯渭橋拓拔思恭屯武功鄭畋屯整屋弘夫乘龍尾之捷進薄長安巢率衆東走程宗楚先入弘夫繼之處存帥銳卒五千夜入城民謹呼出迎爭以瓦礫擊賊軍士釋兵入第舍掠金帛妓妾賊露宿霸上調知官軍不整還襲之大戰長安中宗楚弘夫死軍士死者十八九處存收餘衆還營巢復入長安縱兵屠殺流血成川謂之洗城諸軍皆退五月高駢以雙雉集廣陵府舍占曰城邑將空惡之乃傳檄四方云將入討黃巢發兵八萬舟二千艘屯東塘諸將數請行期駢托風濤爲阻竟不發巢之陷長安也忠武節度使周岌降之嘗以夜宴急召楊復光左右曰周公將不利於內侍不可往復光曰事已如此不可圖全卽詣之酒酣岌言及本朝復光泣下良久曰丈夫所感者恩義耳公自匹夫爲公侯奈何捨十八葉天子而臣賊乎岌亦流涕曰吾不能獨拒賊故貌奉而心圖之今日召公正爲此耳因灑酒爲盟分軍八千人爲八都遣牙將鹿晏弘晉暉王建韓建張造李師泰龐從等八人將之復光帥之以擊朱溫敗之遂克鄧州六月以鄭畋爲司空同平章事都統如故李克用陷忻代二州自稱大同留後八月感化軍節度使支詳遣將時溥陳璠將兵入討巢二

人皆詳所獎拔也。至東都，矯稱諱命，還師河陰，掠鄭州而東，及彭城，詳迎勞甚厚。溥說詳曰：衆心見迫，請公解印以相授，詳不能制，溥送詳歸朝。璠伏甲於七里亭，并其家屬殺之。九月，高駢罷兵還府。十月，天平節度使曹全晷與賊戰，死之。鳳翔行軍司馬李昌言屯興平，時鳳翔倉庫虛竭，犒賞稍薄，昌言因激其衆，引軍還襲府城。鄭畋登城謂之曰：行軍苟能戢兵愛人，亦可順守矣。乃以留務委之。即日西赴行在，詔以畋爲太子少傅，昌言鳳翔節度使。以時溥爲節度使。二年正月，帝居成都，以王鐸爲諸道都統，鐸以高駢無心討賊，身爲首相，發憤請行，懇款流涕。至於再三，上許之。以鐸充都統，罷高駢，但領鹽鐵轉運使。鐸辟崔安潛爲副都統。以周岌、王重榮爲司馬，諸葛興、康實爲先鋒使。又以王處存、李孝昌、拓拔思恭爲京城三面都統。以楊復光爲南面行營都察使。三月，朱溫據同州，以鄭畋爲司空，同平章事。軍事一以咨之。李克用寇蔚州。四月，王鐸將兩川與元之軍屯靈感寺，涇源屯京西，易定、河中屯渭北，邠寧、鳳翔、屯興化，保大、定難、屯渭橋。忠武屯武功。官軍四集，漸逼長安。巢勢日蹙，號令所行，不出同華。忠武監軍楊復光率陳蔡兵萬人屯武功。王重榮與連和擊賊將李詳於華州，執以殉。賊使尙讓來攻，而朱溫將勁兵居前，敗重榮兵於西關門。於是出兵陳蔡，掠河中漕米數千艘。重榮選兵三萬攻溫，溫懼，悉鑿舟沉於河。舉同州降。復光欲斬之。重榮曰：今招賊一切釋辜，且溫武銳可用，殺之不祥。表爲同華節度使。十月，以溫爲河中行營招討副使，賜名全忠。賊帥韓秀昇屈行從，斷峽江路。巢喪二州，怒甚。將軍數萬壁梁山，重榮軍華陰。復光軍渭北，犄角攻之。賊大敗，執其將趙璋，巢中流矢走。諸道軍會關中，獨平盧不至。王鐸遣判官張濬往。

說之時平盧大將王敬武方逐節度使。自爲留後。已受巢官爵。不出迎濬。見而責之曰。公爲藩臣。侮慢詔使。不能事上。何以使下。敬武愕然謝之。旣宣詔。將士皆不應。濬徐諭之曰。人生當先曉逆順。次知利害。黃巢前日販鹽虜爾。公等捨累葉天子而臣之。果何利哉。一旦賊平。天子返正。公等何面目見天下人乎。將士皆改容引咎。敬武卽發兵從濬。而西。十一月。黃巢兵勢尙強。復光曰。雁門李僕射驍勇。有強兵。素有狗國之忠。所以不來者。以與河東結隙爾。若以朝旨諭鄭公而召之。必來。來則賊不足平矣。時王鐸在河中。乃以墨勅召克用。喻從讜。克用遂將沙陀萬七千人趨河中。不敢入太原境。獨以數百騎過晉陽城下。別從讜從。厚贈之。十二月。以李克用爲雁門節度使。克用將軍四萬皆衣黑。賊憚曰。鷄軍至矣。當避其鋒。三年正月。李克用敗賊將黃揆於沙苑。王鐸以克用爲東北面行營都統。先是。諸將雖環賊。莫肯先。及鐸檄至。號令殷然。士氣皆起。爭欲破賊。故巢戰數蹙。田令孜策賊必破。欲使功出於己。乃搆鐸於帝。罷檢校司徒。以義成節還屯。鐸功將就而讒見奪。然卒因其勢困賊。數月復京師。策勳居關東諸鎮第一。田令孜自以建議幸蜀。收傳國寶。列聖眞容。散家財犒軍。爲己功。宰相請加賞。以爲十軍十一衛觀軍容使。三月。巢兵數敗。食復盡。陰爲遁計。發兵三萬控藍田道。遣尙讓救華陰。李克用及王重榮引兵逆戰。破之。克用進軍渭橋。每夜令其將薛志勤。康立潛入長安。焚積聚。斬虜而還。賊中大驚。諸葛爽取河陽。李克用復敗尙讓於零口。遂取華州。五月。克用與忠武將龐從。河中將白志遷等引兵先進。與巢軍戰於渭南。一日三捷。義成。義武等軍繼之。賊衆大奔。克用等入京師。巢焚宮室遁去。多遺珍重於路。官軍爭取之。不急追。

賊遂逸去。詔克用同平章事，斬巢相崔璆。楊復光露布，王重榮屯田待敵，率士當衛，收百姓十餘萬家。降賊黨三萬餘衆，自收同華，進逼京師。李克用自遣本軍南下，與臣同力前驅。今月八日，遣前鋒楊守忠等三十二都，隨克用自光泰門先入京師。又遣河中將劉讓等七十都繼進。賊尚有堅陣來抗官軍。李克用率勵驍雄，整齊金革，楊守忠等齊驅直入，合勢夾攻。自卯至申，羣寇大潰。自望春宮蹙賊，至昇陽殿合圍。其賊卽時奔遁，散入商山。自收平京國，三面皆立大功。若破敵摧鋒，雁門實其居首。其餘將佐，同効驅馳。克用時年二十八，於諸將最少，而兵勢最強，功居第一。諸將皆畏之一目微眇，視人謂之獨眼龍。六月，巢使其驍將孟楷將萬人擊蔡州。節度使秦宗權逆戰而敗，遂稱臣於巢。初，陳州刺史趙犇謂將佐曰：巢不死長安，必東走，陳其衝也，不可不爲備。乃完城塹，繕甲兵，積芻粟六十里之內。民有資糧者，悉徙之入城。多募勇士，使子弟分兵將之。楷果移兵擊陳，犇先示之弱，伺其無備，擊襲殺獲殆盡，擒楷斬之。巢聞之，怒與宗權合兵圍之，掘塹五重，百道攻之。陳人大恐，犇諭之曰：忠武素著義勇，陝州號爲勁兵，況吾家久食陳祿，誓與此州存亡。且狗國而死，不愈於臣賊而生乎？有異議者，斬。數引銳兵，開門擊賊，破之。巢益怒，營於州北，爲持久之計。時民間無積聚，賊掠人爲糧，置春磨寨。七月，以李克用爲河東節度使，鄭畋爲司徒。田令孜、陳敬瑄令鳳翔節度使李昌言上言：軍情猜忌，不可令畋扈從過此，乃罷爲太子太保。驍衛上將軍楊復光卒於河中，令孜大喜。九月，以時溥爲東西兵馬都統。四年四月，周岌、時溥、朱全忠等以黃巢兵尙強，求救於李克用。克用將蕃漢兵五萬救之。巢圍陳州幾三百日，趙犇兄弟大小數百戰，雖兵食將盡。

而乘心益固。克用會許汴徐兗之軍於陳州。攻尙讓拔之。巢懼。五月大雨平地三尺。巢營爲水所漂。且聞克用至。遂引兵東北趨汴州。至尉氏。尙讓以驍騎五千進逼大梁。全忠復告急於克用。克用追之。及於中牟。北至蒲渡。乘其半渡。奮擊大破之。斬萬餘人。賊遂潰。尙讓帥其衆降。巢踰汴而北。克用追擊之於封丘。又破之。巢收餘衆近千人。東奔兗州。克用追至冤句。騎能屬者纔數百人。晝夜行二百餘里。以糧盡還汴州。欲裹糧復追之。獲巢幼子及乘輿服器符印。得所掠男女萬餘人。皆縱遣之。克用至汴州。朱全忠襲之。走還晉陽。四年六月。尙讓敗黃巢於瑕丘。巢伏誅。巢甥林言、斬巢兄弟妻子首來降。林亦伏誅。七月。時溥獻黃巢首。封克用隴西郡王。十二月。王鐸從義昌節度使過魏州。魏博節度使羅彥禎之子從訓圍而殺之。掠其侍妾。朝廷不詰。改元光啓。元年正月。車駕發成都。三月。至京師。王仙芝自甲午起。至乙未。巢應之。甲辰始伏誅。首尾凡十年。

此爲元人鈔本。按吳越備史。錢武肅王曾以二十騎。擢巢兵百萬。其餘殺賊制勝。戰功甚多。而此絕不齒及何也。梅谷陸烜識。



唐書直筆

呂夏卿撰

本館叢書集成初編所選
聚珍版叢書及小萬卷樓
叢書皆收有此書小萬本
有校注故據以排印

唐書直筆卷一

帝紀第一

宋 呂夏卿撰

名字

王者帝天下名。所以事宗廟禮天地也。其餘接見臣下。從謙稱。則名無所通焉。帝名之例。始于范蔚宗。陳壽。古今之通制也。史記漢書不載帝名。失于簡略也。

漢高祖以劉季稱。光武以文叔稱。然則帝之有字尚矣。唐高祖字叔德。劉昫之書不載。案劉昫原本訛。劉敬今校改。史之闕文也。

書母

禮家貴嫡。示天下之本也。非嫡則不書母。母以子貴。子以母貴。子立。然後書所以生于母傳。正也。

代宗紀書曰。母章敬吳皇后。案章敬原本訛。章恭今校改。餘則不書所生母。如元獻楊太后傳中載生肅宗。故略于此。

即位

繼世而立。書即位。常文。

書曰。皇太子卽位于柩前。書柩前。示承顧命之重也。

繼故而立。其賊不討。則爲子之誼輕。不稱太子。無嗣父之道也。

文宗紀。書曰。寶歷二年十二月。皇帝卽位。敬宗遇弑。文宗以弟繼統。縱賊不討。貶也。穆宗紀。書曰。元和十五年正月。皇帝卽位。不稱太子者。陳宏志不討。則太子之誼不明。故從兄弟稱。用文宗例。明以帝制而立也。中宗紀。書曰。案中宗原本訛。哀宗今校改。景龍四年六月。溫王卽皇帝位。哀帝紀。書曰。天祐元年八月。輝王卽皇帝位。微不足以討賊。非貶也。不稱皇太子者。矯先君之顧命。出于一時之權宜。故但以溫王。輝王。書。

內禪

內禪。非正之制也。涉權宜而逼大體。則書踐阼而不稱太子。傳襲計定。人無異志。則書踐阼而不稱皇帝。若讓不忍嗣然。

高祖紀。書曰。武德九年八月。皇帝傳位爲太上皇。案睿宗原本訛。高宗今校改。

先天元年八月。皇帝傳

位爲太上皇。太宗紀。書曰。八月。太上皇傳位。皇帝踐阼于顯德殿。明皇紀。書曰。八月。太上皇傳位。庚子。

皇帝踐阼于武德殿。太宗。明皇紀。皆先載建成。元吉。太平公主之難。及事克。內禪之命行焉。臣子之謀。

非一朝一夕之故。變日居傳位之下。復出太上皇傳位。明神器有所授也。順宗紀。書曰。貞元二十一年。

八月。皇帝傳位于皇太子。憲宗紀。書曰。貞元二十一年八月。內禪。乙巳。皇太子踐阼于宣政殿。錄內禪。

以起踐阼者。人望所屬。宗廟有主。推天命之歸。故不書太上傳位。不嫌所授不明也。受內禪。不書卽位。嫌父在而取大寶。稱踐阼。明代父之誼。從緩文。

立太子

太子社稷之繫。父在。不得以君稱。書名從臣下之辭。人神所歸。則書立。

睿宗紀書曰。景雲元年七月。立皇太子隆基。是也。

立不以正。非天下之心所在。則書子。從私恩也。

高宗紀書曰。永隆元年八月。立子哲爲皇太子。是也。

太子薨。不名。謚葬在乎傳。不成恩也。德或無良。雖嫡亦絀。先書廢。從天下之志也。

文宗紀書曰。開成三年九月。廢皇太子永。與太宗紀廢皇太子承乾同文。天下之人。知其可廢。亦不足。以爲君。故先云廢。

嬖奪其恩。廢不以過。後書廢。非得罪于天下。天下不知太子之廢也。

明皇紀書曰。開元二十五年四月。皇太子忠廢。與高宗紀皇太子賢廢同文。謂無可奪之罪。後云廢。從。緩。不。忍。辭。

其德足以奉祿。而失愛君親。罹于非命。書殺迫也。

中宗紀書曰。景龍三年七月。殺皇太子重俊。不書部下所殺。稱君命。以紓海內之痛。

立皇后

皇后共承宗廟。海內之母。立以德。不以愛。正家之道也。先書君命。正也。

太宗紀書曰。武德九年八月。立皇后長孫氏。先書立德。選肅宗紀書曰。至德元年四月。立皇后張氏。同文。張氏雖以凶終。然其惡不累。故用異例。

廢以罪。不以私。則書廢。從天下之人廢之也。

明皇紀書曰。開元十二年六月。廢皇后王氏。不稱廢爲庶人。嫌齊體之偏也。王皇后詔載于本傳。若無罪。不出詔。加罪之誣。不足信于後人也。

立以嬖。不以德。廢以譖。不以罪。則異文見實。

中宗紀書曰。神龍元年。立妃韋氏爲皇后。高宗紀書曰。永徽六年七月。皇后王氏廢是也。以愛奪權。以計得衆。立非恩德。則從自立文。

高宗紀書曰。永徽六年十月。皇后武氏立是也。凡立后。恩澤皆出于己。大赦天下。老人賜粟。不出高宗紀者。惡武后之立。正始而杜漸。故但載武后本傳。

國變遭緇。書權臣之命。幽逼致崩。云死。惟皇后不云殺。嫌齊體也。

哀帝紀書曰。天祐二年十二月。皇后何氏死。乙酉。朱溫追廢皇太后何氏是也。庚戌。輟郊詔。載于何后本傳者。惡朱溫之誣。故不出哀紀。

宰相拜復

宰相國之股肱。升黜書于紀。重安危之本也。書得人。不備官。

睿宗紀書曰。景龍四年四月。以許州刺史姚元之爲丞相。不書爲兵部尙書門下三品。具本傳。瘵官不書君命。懲濫恩也。

明皇紀書曰。開元二十四年十一月。牛僊客爲丞相是也。

用得其人。功利社稷。因其媒孽。而輟柄用。則先名而後免。

明皇紀書曰。開元二十四年十二月。丞相張九齡罷。以一時之罪。而惜其功。不欲聞罪免之命。故後罷。用緩辭于本傳。復書某月某日罷。以某代之。足紀文也。罷相之後。或更方鎮。遷他官。皆詳于本傳。德宗紀書曰。貞元十一年四月。丞相陸贄貶于忠州。贄以太子賓客貶忠州別駕。猶書丞相者。繇上意之回惑。庸讒之枉譖。雖竄謫善人。遠方而天下之望不替。故猶稱丞相。不書別駕。而稱貶者。君命實放逐。其虛器所加從略。

不勝其任。以過而罷。則先免而後名。國罰明也。有罪之放。先書貶。錄過以正罰。則罪名正而天下服。德宗紀書曰。建中四年十二月。貶丞相盧杞于新州。位浮其材。海內知其可去。故先書貶。竄之命。宰相薨于位。書名而不氏。

代宗紀書曰。大歷十二年七月。丞相綰薨是也。罷相書氏。

大勳勞書薨記功也。賢臣死于貶所書地隱之也。

德宗紀書曰：建中元年五月，汾陽王郭子儀薨。貞元五年八月庚戌，西平王李晟薨。錄勳勞也。德宗紀

書曰：貞元某年某月，丞相陸贄卒于忠州。文宗紀書曰：太和九年七月，丞相宋申錫卒于開州。非罪而

黜，雖死書舊官，記終也。變薨言卒者，傷賢臣不復，故輕文譏王者不能用舊臣也。宗室屬遠亦書。明皇

紀書曰：天寶十一年十月，信安王禕薨是也。

賢臣云亡，海內所痛，位名氏備而書卒。若廢朝簡而贈賻殺，則不書。

敬宗紀書曰：長慶四年十二月，吏部侍郎韓愈卒。賢臣記終也。賢相告老乞骸骨書薨，與賢臣異文。

宗紀書曰：開成四年三月，晉國公裴度薨，不書丞相，罷也。

殺大臣有罪書伏誅，無罪書賜死，非君命書害。

代宗紀書曰：大歷十二年，宰相元載伏誅，國法行也。中宗紀書曰：天授二年十月，左相岑長倩賜死。案

書新書並載殺岑長倩于武后紀，此作中宗紀，當是夏卿修史時所擬改。逼君命也。中宗紀書曰：神龍二年某月，武三思害侍中桓彥範及

敬暉，袁恕己。文宗紀書曰：案文宗原本訛太和九年十一月，仇士良害宰相王涯及賈餗，舒元興。書三

思與士良之名，惡專戮大臣也。

餘臣有罪書誅，無罪書殺。

明皇紀書曰：天寶六載春正月，誅北海太守李邕。開元二十五年三月，殺監察御史周子諒。書誅者成。

法不可變。王者至公之刑也。書殺者。觸威忤旨。罹于非命。王者一時之罰也。

命將征伐

征伐。國家廢興之大政也。將得人。書帥師。討有罪。書伐。

高宗紀。書曰。乾封元年十月。遼東道大總管李勣帥師伐高麗。不云命司空英國公李勣爲遼東大總管者。紀書成命。傳其實事也。

將非其人。書王師。伐不得罪大戰。書及。

明皇紀。書曰。天寶十四載四月。王師及雲南大戰于瀘川。敗績。不書劍南節度使鮮于仲通將之者。貶無功也。書及者。無名興師。及爭土拓地。玩威喪徒。國家危亡之釁。故不書王師不勝。通以敗績。書將擅出師。雖伐得罪。出而有功。皆書自專。

書曰。某月某日。將軍某以師伐某國。以者。左右自用之文。

官軍失利。以將名師。惡衄國也。効命而死。書失利。將奔北。俘辱。書大敗。

明皇紀。書曰。開元二十年閏三月。郭英傑之師失利于都山。英傑死之。英傑蹈義喪元。不隕臣節。書死而再名。嘉之也。明皇紀。書曰。天寶十四載十二月。封常清之師大敗于嬰子谷。幸陝郡。十五年六月。哥舒翰之師大敗于靈寶。執哥舒翰。翰及常清奔。書執之。再名。罪失律也。英傑、常清皆一時名將。雖敗軍。猶不稱王師。

王師有功。執其醜虜。書獲。

明皇紀書曰。天寶十四載十二月。常山太守顏杲卿敗安祿山之軍。獲其將何千年。高邈。以似禽獸。稱獲。

將以辱命而誅。書斬于軍中。否則書斬。殺無罪也。

明皇紀書曰。天寶十四載十二月。高仙芝封常清。斬于軍中。誅辱命也。勝負之勢。用兵常數。士不素習。輿尸奔北。雖國法必申。而其罪可貫。用經文書曰。某年斬將軍某。

裨校之屬。雖有功。書元帥之名。重兵柄之分也。

德宗紀書曰。建中二年十一月。宣武節度劉洽。破淄青李納之軍于徐州。不書神策將曲環名。一軍政于劉洽也。

執戎狄。則大將不名。

太宗紀書曰。貞觀四年三月。執突厥頡利可汗是也。以能禽之。故大將不名也。

破戎狄。必稱王師。

太宗紀書曰。王師破突厥于陰山。不書李靖之名。舉中國之重也。其餘具突厥。靖傳。不稱王師者。窮兵黷武。非中國之道。用輕文。

太宗紀書曰。十四年八月。平高昌城。十九年五月甲申。收遼東城是也。

戎狄之心。勢窘則幸生。服叛不一。無嚮化之常。惟可汗來奔則書。

太宗紀書曰。三年十二月。突厥突利可汗什鉢苾來奔。其餘雖名王酋豪來。皆載之本傳。不列帝紀。不與中國受叛人也。明皇開元二年。突厥默啜妹婿火拔頡利發石失畢來奔。不書明皇紀是也。戎狄之俘。獻于社廟。不書大將之名。受俘亦如之。懲首事也。

太宗紀書曰。貞觀四年三月。獻突厥之俘于太廟。二十三年正月。獻龜茲之俘于社廟。明皇紀書曰。開元二十年五月。皇帝御應天門。受契丹俘是也。

中國之俘。獻于社廟。皆書大將之名。受俘亦如之。褒大功也。

高祖紀書曰。

案高祖舊說高宗今校改

武德二年七月。秦王獻寶。建德。王世充之俘于太廟。憲宗紀書曰。元和十四

年二月。皇帝御興安門。受田弘正所獻李師道之俘是也。

宰相統兵。書天子遣師。重本朝之寄也。

憲宗紀書曰。元和十二年八月。裴度征淮西。吳元濟。皇帝御通化門。遣師。昭宗紀書曰。龍紀元年五月。張濬征太原。李克用。帝御安喜門。再拜銜涕而辭。上賜之犀帶。具本傳。

公主下降

公主下嫁外國。必書逆女之使。

太宗紀書曰。十三年十二月。吐谷渾遣使來逆女。十四年二月。宏化公主歸于吐谷渾。春秋紀裂繻來

逆女中國之臣得以名通吐谷渾慕容諾曷鉢逆女不書名惟以使稱不書逆女之使以公主大歸爲名。

淮陽王道明送宏化公主不書本紀尊中國也具吐谷渾傳而已。

外國求婚之使不書于紀使若其請不必皆然。

貞觀十四年六月薛延陀遣使求婚具吐蕃傳是也中宗紀書曰景龍三年十一月吐蕃遣使逆女四年正月車駕幸始平送金城公主歸吐蕃緣當時之意故異文非新例也曲赦咸陽故不書于紀具吐蕃傳足本傳之文也。

公主釐降無求婚逆女之使則不書于紀禮不足也。

開元五年固安公主妻奚首領李大酺

案唐書奚國傳作李大輔

永樂公主妻李失活乾元元年肅宗第二女寧

國公主

案寧國舊訛寧親今校改

出降回紇皆具本傳而略于帝紀爲中國諱也。

公主無子絕歸則書自還。

肅宗紀書曰乾元二年八月寧國公主自回紇還是也。

結好不固以師而歸變文書至喜之也。

武宗紀書曰會昌三年三月太和公主至自回紇是也。

公主死于外國則書于帝紀而略于本傳。

書曰某月某日公主薨于某國是也。

外國之君赴告不書于紀。

春秋吳越之國卒而不書葬惡其僭而失禮外宗稱蕃而臣其一國風化之所不及卒雖赴告當列于本傳。

絕域內屬書本傳倣慢防之易也。

聖人內事必有外憂故四夷奉珍獻寶奔走京師其心非素被天王之化顧其勢使然故不列帝紀是不忘豫防之警。

結好之盟先書戎狄以明汲汲也。

德宗紀書曰建中四年正月吐蕃及鳳翔節度使張鎰盟于清水戎狄無信盟詛末節要以神明之信非中國之福故先書吐蕃示汲汲于中國也不書吐蕃相尙結贊之名所以重中夏也。

渝盟有變則不地。

德宗紀書曰貞元二年閏月吐蕃及侍中渾瑊盟執我行人崔漢衡路泌以下皆不書微也。

戎狄乞盟不書渝盟之臣蒙上文也。

穆宗紀書曰長慶元年九月吐蕃乞盟十月及吐蕃盟不地不書丞相植洺盟皆具吐蕃本傳。

亂臣

亂臣賊子其謀有漸王者執馭下之柄必防微塞源焉書起而不云叛責失御也

明皇紀書曰天寶十四載十一月安祿山起于漁陽是也

負固怙亂之雄乘伺釁隙而作有國所不免書叛有地也

德宗紀書曰興元元年二月李懷光以河中叛憲宗紀書曰元和二年十月李錡以潤州叛是也

無地書據

劉闢以西川行軍司馬因章臯之薨竊據成都憲宗紀書曰貞元二十一年八月劉闢據成都以叛無地也

竊地自固非君命所授用自立文

德宗紀書曰建中二年二月梁崇義以襄陽自立以五使宣諭李舟如荆襄拒境不納是反狀已明至是加崇義同平章事不受詔故以崇義自立爲文

軍逐其帥不預謀而立用衆立文

穆宗紀書曰長慶元年七月幽州立其帥朱克融是也不書立洄具本傳

蕃臣失撫馭之和以羅逼脅用衆逐文

穆宗紀書曰長慶元年七月幽州逐其帥張宏正是也

非意之變失備見逐書奔

文宗紀書曰

案文宗原沖諱太宗今校改

太和五年正月李載義自幽州出奔是也

春秋諸侯之子列于盟會則位定方鎮之孤以留後自立朝廷因而授之容非篡盜書立

德宗紀書曰貞元二年六月滄州程懷直立是也不書程日華卒者方鎮不卒

拒君命于外失臣子之義書拒以見惡

肅宗紀書曰上元元年二月來琪以襄陽拒命是也不云叛其惡輕

唐書直筆卷二

帝紀第一下

方鎮

方鎮逞兵以闕王土。侵軼得地。圍城。皆同文。

穆宗紀書曰。長慶元年十一月。成德王庭湊圍牛元翼于深州。二年三月。成德王庭湊入幽州。案新舊唐書紀傳。自長慶元年七月後。幽州爲朱克融叛據。二年三月當書王庭湊入深州。此訛深作幽。或上文有脫佚。書曰。入者。惡其專也。德宗建中四年正月。淮西李希烈寇汝州。不書其將。以希烈首惡也。

方鎮違命。擅甲兵以侵軼。其首酋惡。故不書將。

春秋諸侯大夫帥師皆書。方鎮專征犯上。無君之惡莫大焉。故削其將兵之臣名。則其惡不分。蓋深繩之也。

王師破方鎮之兵。書而繫以名。

德宗紀書曰。建中二年七月。馬燧破魏博田悅之軍于雙岡。書破。示剿絕凶逆。魏博者。惡悅以地自專。故書破。用國文。

棄地不書名。重圍絕援。其力不足以自全。雖奔諱其惡。

肅宗紀書曰。至德元年十月初。棄平原郡。二年八月初。棄靈昌郡。不書顏真卿許叔冀之名。力不足也。肅宗紀書曰。至德二年五月。魯炁自南陽歸襄陽。穆宗紀書曰。長慶二年四月。牛元翼自深州歸京師。若全師歸來也。

方鎮不軌。王臣不能固守。墜節而喪國土。書地以見重。

德宗紀書曰。建中四年十二月。李澄以滑州降李希烈。懿宗紀書曰。咸通九年十月。崔雍以和州降龐勛是也。

方鎮叛亡之人。書歸以明同惡。

代宗紀書曰。大歷十年正月。昭義叛卒裴志清歸于田承嗣是也。

方鎮敗王者之師。書不利以避岷國。

德宗紀書曰。建中四年九月。王師及淮西李希烈戰于襄城。失利。不書哥舒曜者。師爲重也。

方鎮熾結扼王土之衝。足以爲一時之患。則書之。

德宗紀書曰。建中二年三月。淄青李正己以兵屯濟陰是也。

方鎮擅徙所居。則書之。

德宗紀書曰。建中三年七月。淮西李希烈遷于許州。代宗紀書曰。大歷十二年某月。淄青李正己遷于鄆州是也。

方鎮因釁篡逐。用兩下相圖文。

代宗紀書曰。大歷十四年。淮西李希烈逐李忠臣。憲宗紀書曰。元和四年十一月。蔡州吳少陽殺吳元慶。皆不書其帥。

方鎮承命以討叛。則書帥師。

德宗紀書曰。建中二年八月。淮西李希烈帥師伐山南梁崇義是也。

攻伐非君命。則以國抗。

代宗紀書曰。大歷十年十月。易定李寶臣敗魏博之軍于清水。不書敗田承嗣之將盧子期者。不與寶臣尋戈擅命也。

王師克土。書收。大將以恩信得其地。書入。其下捨逆以聽命。書歸順。其下取元惡以自効。書獻。

德宗紀書曰。建中四年三月。李臯收黃州。某月。李臯入安州。明不用甲兵也。代宗紀書曰。大歷十年十

一月。吳希光以瀛州歸順。案舊書作吳希光以城降。新書作吳希光以瀛州降。憲宗紀書曰。元和二年十月。浙西裴文良執李錡

以獻。十四年二月。淄青劉悟斬李師道以獻。不云其帥者。獲罪于朝。不得以臣子申。故用兩下文。

王師平方鎮。先得地而申戮。若凶渠授首。而闔境甫定。則先得雋而後地。

憲宗紀書曰。元和十二年十月。王師平淮西。吳元濟斬于京師。其民久染汚俗。無向化之心。環數千里之地。甲兵富彊。踰年然後破。繇先翦其境土。乃得元惡。故先書平淮西。後云元濟斬也。武宗紀書曰。會

昌四年八月王師斬劉稹澤潞平罪人共得故書王師斬劉稹各用便文也平淮西澤潞不書李愬石雄而書王師申國威也

方鎮之寄脅于權宜則書失地之漸宰相失廟堂之謀徇方鎮之請則書授地以罪之

穆宗紀書曰元和十五年十月初失澤潞謂以劉悟爲昭義軍節度使是書失地之漸也敬宗紀書曰寶歷元年十二月宰相李逢吉以澤潞授劉從諫以棄地罪逢吉

方鎮拒命奪官爵絕朝貢示天罰之必行也

憲宗紀書曰元和四年十月削成德王承宗官爵元和十年七月絕成德王承宗朝貢書地以明國章討叛命將稱詔

明皇紀書曰天寶十四載十一月詔封常清帥師討安祿山代宗紀書曰大歷十年四月詔馬燧帥師討李靈曜憲宗紀書曰元和十一年九月詔李愬帥師討吳元濟是也

命將權鈞力齊則不書統帥之名

肅宗紀書曰乾元元年九月詔九節度之師討安慶緒不書郭子儀李光弼之名軍政不一也憲宗紀書曰元和十一年正月詔六鎮之師討王承宗不書河東幽州盧龍義成橫海魏博昭義節度亦此義也

伐叛因其黨斬首遂平則不書王師之功

德宗紀書曰貞元元年七月李懷光斬于河中者以賊將牛名俊斬懷光首以城降故不書馬燧之功守土之帥以師相攻擅甲兵之威蔑朝廷之命則書舉兵攻地。

代宗紀書曰永泰元年五月漢州刺史崔寧舉兵攻劍南不書攻郭英乂以王事爲重也。

守土之帥乘甲兵土地之勢固封疆以樹腹心則書地以記薨君子樂善而忘惡雖功有餘而心不至者皆得以臣道終。

順宗紀書曰貞元二年十一月八日章皐薨于成都先薨後地者因其薨殂得地如晉陶侃薨而得荊州之類。

軍亂其帥見殺以非罪書遇害。

文宗紀書曰太和四年二月興元軍叛其帥李絳遇害先叛後殺者聞軍變尙冀其生不忍聞其死用緩文。

軍亂殺其帥以罪書衆殺。

敬宗紀書曰寶歷二年五月幽州殺其帥朱克融。

方鎮效順舉族還朝書歸地。

憲宗紀書曰元和五年十二月張茂昭以易定來歸非兵革所加而得其地書入以褒忠臣其地襲爲己有必其心堅于效順乃得之故以來覲賜對爲書歸地之日不以管籥符印付任簡迪爲歸地也書。

歸以明舊地。

逼于天時。懼罪入覲。書得地。

憲宗紀書曰。元和三年九月庚寅。得復襄陽。先是于頔爲其子所諷。歸朝入覲。至是日册拜司空。以裴均爲山南東道節度使。是朝廷始復得故地。因以是日書復襄陽也。非其心效順。故不書頔以襄陽來歸。朝廷喜得地而貸罪。國法無所申。故不書頔。至自襄陽也。憲宗紀書曰。元和十四年八月己酉。復得宣武。韓宏以七月戊寅來朝。願奉朝請。至是日拜司徒。癸丑。以張宏靖爲宣武節度使。是朝廷以宏靖堅爲戎務。始復故地。因以己酉爲復得宣武。與于頔事同。惟得地已定。宏靖受命。緩故書己酉。非異例。方鎮昭洗。一時之計。先書輸賦獻地。以蓋國恥。

憲宗紀書曰。元和五年七月庚子。成德王承宗請輸常賦以緩師。丁未。昭洗王承宗。復其官爵。十三年三月甲寅。成德王承宗獻德博二州以緩師。庚辰。昭洗王承宗。復其官爵。先是五年。承宗請輸常賦。朝廷降授官。史不書紀者。以輸賦爲重于時。昭洗之命。因李師道劉總。亟請不得已而從之。不書師道請者。宥過正罰。國家常法。非得緣于臣子之情。故不書。稱緩師。豫當時之志也。

春秋之法。陽虎以家臣竊寶玉大弓。書盜求名亡也。方鎮之重。以狙詐陰竊。發于輦轂。欲不知于人主者。必窮姦而正罪名。故備書盜名不得。蓋示大惡于天下也。

憲宗紀書曰。元和十年三月。淄青李師道盜焚河陰轉運院。十一年正月。成德王承宗盜斷建陵門戟。

十一月成德王承宗盜焚獻陵寢宮。十年六月成德王承宗盜殺宰相武元衡。傷御史大夫裴度。不書。遣張晏等刺元衡。及焚河陰院屋數。斫建陵門戟竿數。皆不書者。本傳載其事以見惡。故紀略文。方鎮來朝必書。功臣則否。擁兵入覲。國家休戚之本。書入朝。臣禮之失也。

代宗紀書曰。大歷九年九月。幽州朱泚來朝。始通幽州也。泚以七月使弟滔奉表以入朝。以九月至京師。故九月乃書來朝。如大歷二年郭子儀。李抱玉。三年馬璘。四年魏少游來朝。皆臣子常禮。載之本傳。昭宗紀書曰。乾寧元年正月。鳳翔李茂貞入朝。不書來朝。迹嫌勢逼。不與其來也。書示臣禮猶存焉。昭宗紀書曰。二年五月。鳳翔李茂貞。邠州韓建。至京師。凌鑠王室。臣禮替矣。變朝書至。譏暴也。方鎮失地而朝。書奔。大去地。書至。

代宗紀書曰。大歷十四年三月。汴宋李忠臣奔于京師。先是。忠臣爲李希烈所逐。狼狽歸朝。故不書來朝。憲宗紀書曰。元和十四年。韓公武。至自鄜坊。書始去鄜坊也。文宗紀書曰。太和三年十一月。王智興。至自徐州。書始去徐州也。

權臣

權臣出入必書。宴對亦書。

昭宗紀書曰。天復三年二月。朱溫歸大梁。宴于內殿。置酒于延喜門。天祐元年五月。朱溫歸大梁。宴于崇勳殿。七月。朱溫至京師。宴于文思毬場。十月。朱溫自河中至京師。對於崇勳殿。甲午。朱溫歸大梁。書

逼也。

權臣征伐書名得地不書殺敵。

昭宗紀書曰景福二年四月朱溫取徐州時溥死先是溫使將王重師牛存節陷徐州溥殺死不書殺者惡其擅國書溥自死不與溫之專戮也得地猶名者尺寸之地得之非唐所有故本溫志以篡取爲文又書曰乾寧四年正月朱溫取鄆州朱瑄死二月朱溫取兗州朱瑾出奔不書其將龐師古葛從周及王重師牛存節之名以溫首惡也不書帥師惡其得衆自大書取使若用奇乘間也。

權臣以號自大雖朝廷所授皆以自稱書。

昭宗紀書曰天復三年二月朱溫自稱諸道兵馬副元帥天祐二年十一月朱溫自號魏王備九錫也。權臣擅命屠害忠良以謀翦王室宰相不道賊賢臣以逞憾皆用兩下相殺文。

昭宗紀書曰景福二年九月李茂貞殺宰相杜讓能哀帝紀書曰天祐二年十二月朱溫殺宰相柳璨。光化三年六月崔裔殺宰相王搏讓能以雷州司戶柳璨以登州刺史猶以宰相書者惡殺大臣也。權臣殺皇子則地。

昭宗紀書曰乾寧四年八月朱溫殺十二王子石隄谷書地痛之也哀帝紀書曰天祐元年八月朱溫殺六王子西內不書蔣玄暉殺之者本朱溫志也。

國變擾攘大臣見害于圍逼則書遇害。

僖宗紀書曰廣明元年十二月于琮崔沆豆盧瑑爲黃巢所害是也

權臣睢盱書得地之始以謹召亂之階

僖宗紀書曰光祐元年三月董昌初得越州錢鏐初得杭州七月李茂貞初得鳳翔中和三年五月朱溫初得汴州書得地之張本

權臣任用之漸必直文以示義

明皇紀書曰天寶二十九載七月以安祿山爲營州刺史平盧節度副使僖宗紀書曰咸通十一年正月以李國昌爲振武節度使中和元年八月王鐸以朱溫爲華州刺史始見祿山國昌朱溫之惡也
權臣闕竅神器遷徙都邑以奉天子爲文

昭宗紀書曰天祐元年閏四月朱溫奉天子都于洛陽不書遷諱偪脅也不書甲辰天子至洛陽者非天子之意也故不書至餘具崔裔傳

四夷册立弔祭之使不書不以中國臨夷狄也

如元和十六年六月以少府少監李銳持節赴南詔册立左贊善大夫許堯佐副之不書憲宗紀若使人傳無殊尤之事則具夷狄之傳

唐制大喪天子以卿大夫告于四夷則書于紀太皇太后皇太后皇后之喪方鎮遣使以告則書本傳如元和十一年四月太后崩劍南李夷簡遣使南詔告哀餘具夷簡傳

戎狄方鎮。拘行人以拒命。賤者名而不官。

太宗紀書曰。貞觀八年十二月。吐谷渾執我行人趙道德。不書鴻臚丞。官微也。

宣慰宣諭使

宣慰宣諭使被執。稱以異國。絕之也。先使後執。不與逆臣繫。王人從緩文。

德宗紀書曰。建中四年四月。太子太師顏真卿使于淮西。被執。不書李希烈軍者。春秋衛伐凡伯。貶之。稱戎希烈肆不臣之逆。故豫其志以國稱。深貶之也。不書宣慰者。君命不申也。

使出疆。能利社稷。安人民。不辱君命。則書宣慰。宣諭之名。

德宗紀書曰。建中四年十二月。以給事中孔巢父宣慰田悅軍。穆宗紀書曰。長慶二年三月。以兵部侍郎韓愈宣慰王庭湊軍。不云魏博及鎮州者。元惡潛伏。不失臣節。不用國文。

行人不能度權宜防變。以辱君命。則書國殺。

德宗紀書曰。建中四年七月。給事中孔巢父遇害于河中。惡國威之沮廢。故懷光得以稱國。用重文。與顏真卿異例。

王者受命。必有驅除。故僭命餘孽。用敵國之文。攻克王土。則書陷。王師失利。書戰而後敗。敵國之臣得以名通。侵伐書將。

高祖紀書曰。武德二年九月。劉武周陷我并州。七月。王世充使其將羅士信。侵我穀州。書將。用敵國之

禮又書曰武德二年九月王師及劉武周戰于介州敗績王師之敗先書者非剋會期日以決勝負遇敵來戰失備致敗從緩文不書裴寂敗姜寶誼死與尸辱命用微者之文

王師勝捷則書大將之名小捷用計詭勝書破

高祖紀書曰武德元年九月秦王帥師及薛仁杲戰于淺水原大敗之俘馘具仁杲傳又書曰武德二年十一月秦王帥師破宋金剛之衆于美良州是小捷用計詭勝同文

僭國

僭命之國以地歸順則先人後地

高祖紀書曰武德二年十月羅藝以幽州歸于我五年七月杜伏威以江東歸于我以者自尊之文窮蹙之寇以地降用國文

高祖紀書曰武德元年十一月隴西薛仁杲降四年十一月荊州蕭銑降以窮兵極討乃取之國用自降爲文書國以得地爲重也

鄰國并吞非王師致討書自滅

高祖紀書曰武德二年某月丹陽沈法興滅四年十一月江東李子通滅五年某月豫章林士宏滅不書李子通王雄誕張善安滅之者強弱吞噬朝廷威力所不知其地不入以不知文

僭竊之國因其下一時之計則地以衆書

高祖紀書曰。武德三年四月。河西執李軌。以地歸于我。六年正月。山東執劉黑闥。以地歸于我。七年二月。漢陽殺高開道。以地歸于我。不書葛德威。安修仁。執黑闥。李軌。張金樹。殺開道者。以衆書也。不云河西。山東。漁陽。平者。非甲兵致討而得地。從自致文。方鎮拒命。其下以元惡自效。則以名見異文也。賊帥來降。其地未入而復叛。則不書于紀。

武德元年八月。涼州李軌以地降。至十月復叛。則書本傳而已。

疆寇病死。道國罰書地。

高祖紀書曰。武德元年八月。薛舉死于隴西。代宗紀書曰。永泰元年九月。僕固懷恩死于靈武是也。疆寇夷定。則先地後滅。略將以明威。

高祖紀書曰。武德四年五月。王師平河北。竇建德滅。丙寅。王師平河南。王世充滅。五年。王師平并州。劉武周滅。先地後滅。以得地爲重。不云秦王平建德。世充。武周者。略將以明威。

叛臣肆噬。取元惡而宥枝附。則不用方鎮敵國之文。

憲宗紀書曰。元和元年九月。高崇文擒劉闢。平成都。一方脅從。民本非懷二心。先得雋。乃取其地。故後云平成都。

逆臣竊大號。書地。示不通于天下。

明皇紀書曰。天寶十五載正月。安祿山僭卽皇帝位。于洛陽。肅宗紀書曰。乾元二年四月。史思明僭卽

皇帝位于范陽。德宗紀書曰：建中三年十一月，朱滔王武俊、田悅僭即王位于魏縣。四年十月，朱泚僭即皇帝位于京師。僖宗紀書曰：廣明元年十二月，黃巢僭即皇帝位于京師是也。

逼脅干紀，原心定罪，不用僭文。

代宗紀書曰：廣德元年十月，吐蕃以廣武王承宏爲皇帝。僖宗紀書曰：光啓二年十月，朱玫以嗣襄王煊爲皇帝。昭宗紀書曰：光化三年十一月，劉季述以太子裕爲皇帝是也。

僭命之盜，爲子所弑，雖得罪于天下，而父子之義存焉。天下所不容，故不書竊位，而記其亡終故事。

肅宗紀書曰：至德二年正月，安祿山爲子慶緒所殺。上元二年三月，史思明爲其子朝義所殺。乾元二年三月，安慶緒亡。代宗紀書曰：寶應元年，史朝義亡，悖義負固，自取潰爛，故書亡。其地未入朝廷，不書平。慶緒、朝義，皆不書，卽僞位，具本傳。

義師

王室有變，舉義以謀興復，則異文以見志。

中宗紀書曰：垂拱四年八月，越王舉師于豫州。九月，越王敗績。光宅元年九月，徐敬業舉兵于揚州。十二月，徐敬業敗績。凡討叛必命將，不書岑長倩、張光輔、鞠崇裕、李孝逸討越王敬業者，不與武氏之抗義舉也。敬業雖以興復爲名，其迹可疑，故不用越王之文。特書起兵，不書斬越王及敬業，隱之也。

巡幸

王者寧謠俗之善惡。知王業之艱難。其行以時。則書。幸。不書。還宮。

明皇紀書曰。開元十年十月。幸興慶宮。不書。還宮者。雖踰月。民不知勞。故不書。

出非其時。稱駕所至。書。還宮。

明皇紀書曰。天寶八載十月。車駕至華清宮。九載正月。車駕還宮。不書。皇帝者。習盤遊之樂。損萬乘之威。以車駕稱。輕銜鑿之變。忘魚服之辱。書。還宮。以見其志。明皇是歲。幸華清宮。踰時忘反。受朝賀于離宮。故危之。

征伐巡守。得禮書。帝失禮書。詔。踰宿。則皆書至。

明皇紀書曰。開元十一年正月。皇帝北巡守。三月。皇帝至京師。得禮也。太宗紀書曰。貞觀十九年二月。詔親征高麗。二十年。皇帝至自高麗。失禮也。以萬乘之重。爭無人之地。馳驟不測之險。危之道也。故書詔征。不使帝者。當失禮之過也。得禮。則書至京師。示無虞也。失禮。則書至自某所者。乘輿未還以前。與事過舉。擾民玩威。下情離動。變生非常。故不書至京師。

朝賀

受朝賀。失禮。則書地。不受朝賀。則不書朔。

明皇紀書曰。天寶九載正月朔。受朝賀于華清宮。失禮也。德宗紀書曰。貞元二年正月。皇帝不受朝賀。憲宗紀書曰。元和十一年正月。以歲饑及宿師罷元會。皆不書朔。

宴饗

燕會得禮則書地失禮則書宴。

明皇紀書曰天寶十四載三月勤政樓宴羣臣憲宗紀書曰十三年二月麟德殿宴羣臣得衍樂慈惠之道行于禮而後于酒食故後書宴中宗紀書曰景龍四年四月宴羣臣于芳林園敬宗紀書曰寶歷二年九月宴羣臣于宣和殿禮至于瀆有濡首俄弁之咎是厚于酒食而忘鹿鳴精誠之意故先書宴賜宴之例則先書賜尊君命也敬宗紀書曰寶歷二年二月賜羣臣上巳節宴曲江亭文宗紀書曰開成二年十月賜羣臣慶成節宴于曲江亭是也。

土木功

土木之功雖用民以時亦書失時之役稱詔。

文宗紀書曰太和八年正月修太廟九月二日詔修曲江昆明二池是時發神策軍修洵曲江從鄭注之邪說故書詔以病奪民之時也。

親蠶

親蠶之禮不書本紀譏后德之不建也。

肅宗紀書曰乾元二年三月皇后禮先蠶于苑中高宗之世武后四親蠶不書其德不足以率天下故載之本傳。

籍田

籍田如禮。則異文以示勸。

高宗紀書曰。儀鳳二年正月。皇帝躬籍田于北郊。明皇紀書曰。開元十九年正月。皇帝躬籍田于龍池。耕籍之禮。王者不以身率下。則三時怠而生業匱。故籍田行禮。書躬而稱地。欲海內知王化尙農也。若如禮以至。九推民忘盡力農田之勞。而相勸于下。必異文以示褒。明皇紀書曰。開元二十三年正月。皇帝有事于籍田。肅宗紀書曰。乾元二年正月。皇帝有事于籍田。不云躬耕者。勸農率下之意明。

失禮過舉

舉難行之事。以便世益民。則書。

明皇紀書曰。開元二年秋七月。焚珠玉錦繡于殿庭。德宗紀書曰。大歷十四年閏月。罷劍南貢春酒。放舞象荆山之陽者是也。

失禮過舉。直文以見惡。

肅宗紀書曰。乾元元年六月初。祠太一神。譏淫祀也。穆宗紀書曰。元和十五年九月。大合樂于魚藻。譏喪制未踰年也。

封禪朝陵。備于志。車駕順動之節。書于紀。重王者出入也。賜酺肆赦。必書一時之澤。

高宗紀書曰。麟德二年十月。皇帝發東都。乾封元年正月。皇帝封太山。禪社首。四月。皇帝至自泰山。明

皇紀書曰開元十三年亦如之其車輅次頓御壇受賀皆見本志惟大赦賜酺備于本紀明皇紀書曰開元十七年十一月皇帝發東都朝五陵戊申皇帝至自朝陵其餘丙申謁橋陵戊戌謁定陵皆見本志惟還宮大赦天下流移人並放還以下載于本紀

災祥

水旱日月蝕星孛霜蝗地震山崩弛役避殿減膳親錄囚徒遣使賑給則載之本紀有天地之變而無修省之實則載之五行天文志懲不戒也

祥瑞福應之事王者盛德所致則載之本紀以事繼日月否則總于一歲之終

書曰某月鳳凰見于某地某郡獻白龜是以事繼于日月也其餘郡國所書虛美所加則書曰是歲鳳凰見某地某郡獻白龜不實也

詔令

號令詔諭民所取信未行而遽改名存而實亡則不書

如貞觀十五年四月詔以來年四月有事于泰山不書太宗紀而見之天文志星索前開元二年十月吐蕃侵渭源詔親征天寶十五載六月將謀幸蜀下詔親征乾元二年十月下詔親征史思明不書明皇肅宗紀而見吐蕃及安史傳

太子事

太子齒胄釋奠加元服謁太廟成君則書于紀。

睿宗紀書曰景龍元年八月三年十一月太子釋奠于太學是也開元七年九月皇太子齒胄于國學。八月皇太子加元服乙丑謁太廟二十一年五月皇太子納妃其後太子瑛廢故皆不書明皇紀具瑛本傳。

皇后事

皇后所行之事不書于紀。

如顯慶五年武后宴親族鄰里命婦于并州龍朔元年武后請禁婦女爲俳優之戲景龍二年韋后以裙上有五色雲大赦天下神龍元年韋后請天下士庶爲出母服百姓二十二成丁五十九免役如此之類亦皆具武韋二后傳舊史載之高宗中宗紀失史法也。

唐書直筆卷三

列傳第二

先後

列傳之作其體有二。一曰年。二曰事。年以先後之事次之。傳以年時爲先後之差。以事迹相類同傳。

特傳

備賢愚。紀成敗。功高行稱。特傳。

若魏文公、裴度、陸贄、韓愈。皆特立一傳。

推父祖以本之。係子孫以終之。

孝子之志。務在顯親。人情重于繼體。每傳必備載祖父名諡官爵。或梗槩其事實。傳未必歷譜其子孫。之世以終始之。功效不著于世。則父祖之名略之。削子孫之係以別他傳。

攷名字。載郡縣。

如房琯。字次律。席豫。字建侯。賀知章。字季真。皆參攷舊集而得其字。舊史皆不書。韓文公。南陽人也。舊史以爲昌黎人。如此之類。皆以郡望書。非史法也。

德業不著而事關一時者。附而不名。

如武后時宰相張光輔、崔元綜等。昭宗時宰相朱朴、鄭綮等。齷齪備位，不足立傳。附于狄仁傑、蕭遘、陸辰等傳。

賜姓

賜姓之例出于近世。旌功烈而親之也。悖臣節而不軌，則復其姓。

如李寶臣當爲張寶臣是也。

四夷所生，非功業垂世，則見于本國。

如僕固懷恩背叛，不宜立傳。見于本國鐵勒傳。

題傳

題傳之目，羣傳以姓，特傳以名，功高以事，迹僞以地。

題傳起于司馬遷。班固至范蔚宗，雖而徧題之，文繁不一，失史法之舊。羣傳以姓，如李白、杜甫，同傳是也。特傳以名，如韓愈、李德裕傳，皆具姓名，題之是也。功高以事，如張柬之、桓彥範等傳，題曰五王傳是也。案舊書中宗本紀，神龍元年五月，封敬暉平陽郡王，桓彥範扶陽郡王，張柬之漢陽郡王，袁恕己南陽郡王，崔玄暉海陵郡王，並加授特進，罷知政事。又桓彥範傳云：武三思居中用事，日夕讒毀彥範也。陽郡王崔玄暉海陵郡王並加授特進，罷知政事。又桓彥範傳云：武三思居中用事，日夕讒毀彥範也。等帝竟用三思計，進封彥範等，雖外示優崇，實奪其權。新書本紀不書封王而書罷，至列傳則題曰五王，迹僞以地者，如李正己、吳少誠傳，題曰淄青李正己傳，淮西吳少誠傳是也。案舊書分次列傳，必題者，歷代前史取法史記滑稽、刺客、佞幸、循吏、酷吏、貨殖、游俠、日者、龜策之題，故儒林、忠義、孝友、隱逸、節婦等傳，如此之類，既不可離，而徧題之，是則題傳之

目不可廢也。

宗室

宗室之子雖有功德亦承本傳。

如李適之、李暉、李孝逸、李暉、李常、李巨、李國貞各附本祖常山王、曹王、鄭王、淮安王、吳王、虢王傳。尙親也。

凡列傳之類有六冠以后妃尊也。次宗室諸王親也。列以僭國受命之始也。序以一時之君臣善惡之總也。繼以四夷王化之及也。終以逆臣成敗之歸也。

后妃傳次以宗室。宗室傳次以十八帝諸子。題曰高祖諸子傳。不當參列傳之間。蓋班固取其參連一時之事。故離列傳之間。唐室諸王不出閣。未嘗干預時政。不測成敗。不立勞效。前序母氏所生。後載子孫相承。以備一代史書之體。故不當循班例。旣條列十八帝諸子之後。次李密、王世充以下。至黃巢、秦宗權而傳終。

凡褒者卒月。貶者卒年。其餘從略。有功德則壽。

如韓愈傳書曰。寶歷元年十二月卒。褒也。韋臯傳曰。貞元二十一年卒。貶也。有功德則壽年若干。謹終也。郭子儀傳書曰。年八十五。李晟傳書曰。年六十五。

諡贈

謚贈之數。非功德不書。懲及幸也。

謚法及贈官。非其人有功德。則不書。

論議

論議表章。以明君上之得失。補國家之利害。非當時所通行。則不書。

如舊史李百藥傳。載封建論。朱敬則傳。載五等論。白居易傳。與元微之書。今皆削而不載。論貨殖之弊。陳禮樂之原。則志之。

如陸贄諫置瓊林大盈二庫狀。韓文公請遷明皇帝議。禘祫議。皆附貨殖及郊祀志。

疏軍旅之宜。斥姦邪之惡。則見之他傳。

如韓文公淮西招討事宜。及黃家賊事宜狀。見于元濟傳及南蠻傳。陸贄論裴延齡。見于延齡傳。辭雖隱。非所以便世。梗槩其事而略其辭。

疏之所陳。不足以通行。則槩舉其事。不復勝載。

詩賦之作。足以揄揚國體而明功烈。則見之。

如杜甫三大禮賦。李白明堂賦。宜見之本傳。元結中興頌。見之安史傳。柳宗元方城。皇武。二雅。見之裴度。李愬傳。

詔策之實。足以信後代。則摭其辭。

詔告君命，創其繁誣而載其實事，則見之本傳。

官爵

以爵升易不常，所居有善則書。

如鄭餘慶傳，官至殿中御史，別無異迹，皆不書。至遷工部侍郎，知吏部選事，上疏論列諸葛述事。案述

說述今 一節可稱，則具書官，不爾則否。
校改

循吏儒林文苑忠烈孝友隱逸節婦，皆得一端，則標其傳而總目之。

其餘若酷吏文藝，皆不足訓世，皆不標其傳名也。文苑之名，起于范蔚宗，如賈至父子、李白、杜甫、王宏中等，不特以藝文見稱，故別立傳，不在文苑傳中。

外戚

外戚之家，恩澤所授，謹厚則無稱，侈汰則害教，其名附于本傳，惟卓然殊尤者立傳。

若竇德明、獨孤懷恩、武承嗣、韋溫等，附于太穆元貞，則天、韋后傳，惟吳激、吳湊兄弟，可以別立一傳。案廣

皇后傳

皇后之傳，編世家之間，居列傳之末，參帝紀之下，子長、孟堅、蔚宗之短也。酌古今之法，則冠于列傳之首，惟陳壽得之。

子長以外戚世祿傳襲烏奕則編之世家而諸后不顯孟堅以元后事連居攝故綴諸后于列傳之末王莽之前以便敘事而後人踵之非通制也天子之尊海內無二雖皇后之貴有臣妾之體蔚宗作紀則君臣之誼混矣故冠之列傳進退得史之體

帝王之興必有內助家道正則天下正每帝必載后妃

舊史文宗不立后妃武宗王賢妃事闕今取楊嗣復傳事立賢妃傳據李德裕兩朝獻替記德妃暴薨事備王德妃傳則敘事之體具矣

妃嬪之愛歿而定諡或以后稱則傳其實不書后

武惠妃稱貞順獨孤貴妃稱貞懿是也

王者之母雖生實妃緣帝者心莫不欲顯親而申養故特以太后稱

元獻楊太后章敬吳太后睿眞沈太后懿安郭太后孝明鄭太后恭僖王太后貞獻蕭太后元昭釁太后皆以子貴不稱皇后

入廟稱后義繫于夫在廟稱太后義緣于子皇太后臨朝總治政事由己則以皇太后某氏稱其餘皇后因子踐阼申尊崇而加號則通以皇后稱

則天皇太后武氏順聖皇太后韋氏皆以臨朝書也韋氏獲罪于天下而國史定名不及于懲惡故韋氏亦以皇太后書舊史題爲韋庶人史之過也

公主附后傳之下。而附降皆書。惟大功勳則異傳。

平陽公主、太平鎮國公主、莊懿長公主、附太穆寶皇后、武后、鄭太后傳。案鄭太后、憲宗妃、不當以代宗女莊懿公主附。此條有訛脫。

志第三

天文志

司馬遷作史記備載當時沿革。爲八書。攬漢興以來之事。有平準、河渠、封禪之書。錄歷代相承之迹。有禮、樂、律、歷之書。辨古今未明之疑。有天官書及班固纂漢書。加以刑法、郊祀、五行、郡國、藝文。名曰十志。其天文志仍載四方經星二十八舍躔離之次。踵子長天官之舊。而日月星辰謫蝕隕石之變。復存于五行志。是繁冗之失中也。

郡國車服志

唐室十八帝之盛。百禮交舉。志當時正朔用歷之本。曰律歷焉。志邦國財用。曰貨殖焉。志禮樂之沿襲。曰禮樂焉。志宗廟鬼神之常祀。曰郊祀焉。志高宗、武后、明皇登封降神之禮。曰封禪焉。志氣沴之侵奸。曰五行焉。志邦國之闊狹。戶口之衆寡。曰地理焉。志經籍之總目。曰藝文焉。志旂章之物色。曰車服焉。凡兩都宮闕制度。園籓之規模。一朝之舊章也。廢牧孳乳之數。駭牝圈印之名。車輅出入。征伐武事所急。有國之常用也。然而歷代未嘗志其名數。非通制也。兩都宮闕。志于郡國之下。天下廢牧乘馬之數。志于車服之

末亦紀事之體也。

贊論

史記八書漢書十志。或有贊論。而不必皆備。蓋于事未盡。梗槩其事。而總斷焉。後人務欲極文采之麗。每志必有贊。是拘儒繁文之病也。

摘繁文闕誤第四

唐書舊史繁蕪闕誤多矣。今特舉大較于左。

高祖紀

高祖紀武德四年十月。趙郡王孝恭平荊州。獲蕭銑。十一月。會稽賊帥李子通以其地來降。謹按銑及子通傳。銑自度救兵不至。便率官屬。總纜布幘。詣李靖軍降。請無殺掠。銑降後數日。江南救兵十餘萬。一時大至。然則銑降得亡國之禮。識天命之正。漢之田橫。未足比也。本紀縱不足異文。亦不當書。獲近乎誣矣。子通爲杜伏威將。王雄誕所攻。窮蹙請降。伏威執之。送于京師。盡收其地。是子通不以地降。紀之誤也。

太宗紀

太宗紀多載潛龍撥亂之功。夫帝王之位。非積勞力而致。太宗征戰。如破魏公而斬宋老生。皆王業始基之迹。當見之高祖紀。敗薛舉。降仁杲。走宋金剛。平劉武周。滅建德。俘世充。翦黑闥。擒圓朗。當見之僧國傳。

武德九年九月丁未。引諸衛兵統將習射于顯德殿。及每日引數百人于殿前教射。自是士卒皆爲精銳。天生五材。孰能去兵。自古皆有武備焉。太宗以萬乘之尊。躬教弧矢。帝王之道。未爲得也。載之本紀。于文爲繁。當見突厥傳。以示備豫。如實錄稱其年十二月癸未。太宗謂司空裴寂曰。比有上書奏事。朕黏之屋壁。出入觀省。如此之類。見于本紀之末。如漢文帝紀。載賜張武之金。以愧其心。罷露臺。以惜費。皆帝王之上德。故國史之法。備載以示也。八月甲子卽位。舊載八月癸亥。高祖傳位于皇太子。太宗卽位于東宮。實則高祖以癸亥詔太宗以甲子卽位。日異而事別。不書甲子之日。是卽位遽而父子之道失矣。太宗、肅宗之例。旣一而告天之文。或載或不載于紀。是史法失于繁簡也。以實錄攷之。是年宋、秦、二州慶雲見。秦州定州。景星見。鳳皇、赤雀、麒麟、騶虞、元狐。見于雋、台、洛、麟、沂、鄭等州。當載之本紀也。貞觀十八年。吐谷渾執行人鴻臚丞趙道德。吐谷渾傳云。趙德楷。未知紀傳孰是。

明皇紀

睿宗明皇紀。景雲二年五月辛丑。西城公主爲金仙公主。隆昌公主爲玉真公主。仍置金仙、玉真觀。開元二年六月。內出珠玉繡服等。令于正殿前焚之。謹按睿宗實錄云。三月癸丑。制爲皇女金仙、玉真公主。于京城各置一觀。仍以金仙、玉真爲名。以年歷推之。五月無辛丑。明皇實錄云。七月。內出珠玉錦繡于殿前焚之。是二紀日月有誤。又景雲二年八月。韋安石爲左僕射。同中書門下三品。當在庚申。而誤書丁巳。開元二年七月。襄王重茂薨。當書丁未。而誤爲辛未。十一月庚寅。葬殤帝。實錄書辛卯。如此之類。實多。如天

寶十三載九月。上御勤政樓。試四科制舉人。加詩賦。實錄所書。則是年十月。舍光殿。試舉人。加詩賦。又十三年十月乙巳。舉國公寶瓊。薨。當在十二月。而誤書十月。本紀所書日月。尤不足信也。明皇以延和元年八月受內禪。改元先天。其年行事。猶繫之睿宗。至二年十二月。改元開元。則其年自正月以下。皆明皇行事。不當復稱先天二年。尙附睿宗紀也。愚謂開元冠年卽位。明皇踐位之始年也。睿宗紀先天元年八月庚子。帝傳位于皇太子。明皇紀復云。七月壬子。制皇太子卽皇帝位。二紀日月誤矣。明皇紀載安祿山叛逆之迹。繁複不當。非成敗之繫。當書之祿山本傳。載于紀者。如十一月丙寅。安祿山起漁陽。十二月辛卯。安祿山陷陳留。甲午。陷滎陽。丁酉。陷東京。辛丑。皇太子帥師討祿山。十五載六月乙未。皇帝幸蜀。丙寅。誅楊國忠。七月庚申。皇帝幸蜀。其餘車駕所次。皆書祿山本傳。從省文。春秋之法。四時具爲年。舊史或闕一月。或闕一時。不書首月多矣。憲宗紀元和。不書四年正月。惟以四月。贅二年十二月下。簡編之闕也。

元獻皇后傳

元獻楊皇后傳云。開元十七年。葬細柳原。明皇命張說爲誌文云。石獸澀兮綠苔黏。宿草殘兮白露霑。園陵閉兮脂粉暗。不知何年兮開鏡奩。按張說集。節閔太子妃楊氏墓誌云。初上在東宮。妃有女弟。選爲良媛。生忠王。又載鞠養忠王之事。然則元獻傳云。肅宗撫鞠于王妃。又引張說誌文。皆誤也。疑元獻之薨。不在開元十七年。劉昫誤以節閔妃爲元獻后也。

德宗紀貞元二年六月橫海程日華卒以其子懷直權知軍州事十年三月懷直來朝賜安業宅復令還鎮十一年九月滄州大將程懷信逐其帥程懷直爲左龍武統軍至六年十二月己丑卒猶以左龍武統軍程懷直卒書于紀而本傳云懷直以爲懷信所逐因來朝覲德宗優容之賜甲第懷信卒懷直子執恭知留後事乃遣懷直歸滄州十六年卒年四十九按順宗紀貞元二十一年七月癸巳橫海軍節度使滄州刺史程懷信卒以子副使執恭起復滄州刺史橫海軍節度使是懷直先卒六年然後執恭總留務以是明之執恭非懷直之子懷直未嘗復歸滄州傳之誤也

孔巢父傳

孔巢父傳建中四年宣慰魏博而德宗紀云建中四年十二月癸酉命孔巢父淄青宣慰紀之誤也巢父傳不書啖守盈出使而書守盈遇害傳之闕也

韓愈傳

韓文公父仲卿謹按李白武昌令韓君去思碑及李翱皇甫湜文公行狀神道碑則仲卿以銅陵尉補武昌令徙鄱陽令終校書郎本傳云無名位謬矣文公安定桓王茂五世孫又雲卿有名大歷間亦常見文公傳首如漢書司馬遷揚雄傳例又李翱皇甫湜張籍侯喜賈島李賀文公之高弟也孟郊李觀盧仝文公所與也皆無卓然殊尤之實附于文公傳末如漢書唐林尊見于兩龔傳此敘事之體也

唐書直筆卷四

新例須知

高祖至哀帝二十帝十四世享國二百八十九年。

高祖子內太宗禪高宗子內中宗子內睿宗弟即子內玄宗禪肅宗子即子內代宗子即子內德

宗子即子內順宗子即子內憲宗禪穆宗子繼子敬宗子即子文宗弟繼弟武宗弟即弟宣宗位即叔

懿宗子即子僖宗子即子昭宗弟即弟哀帝子即子

諸王二百十一

宰相三百七十一人。

高祖十人 太宗二十三人 高宗四十二人 武后六十八人 中宗十六人 睿宗十二人 玄

宗二十四人 肅宗十六人 代宗五人 德宗三十四人 順宗五人 憲宗十七人 穆宗九人

敬宗一人 文宗十三人 武宗七人 宣宗十九人 懿宗十五人 僖宗十四人 昭宗二十

二人 哀帝二人

列傳二千二百四十六人

后妃三十三人 公主二百十四人 列女四十七人 婦人計二百九十四人

羣臣正傳八百六十三人 子孫附見五百八十二人 附傳二百十八人

忠義五十人 孝友二十六人 卓行五人 隱逸二十三人 循吏十九人 宦者二十一人 酷

吏十六人 外國六十二

文武官數

元和中二千七百八十八員

大中二千七百九十九員

十道州縣

關內 河南 河東 河北 山南 隴右 淮南 江南 劍南 嶺南

州府三百二十八 縣一千六百三十九

羈縻州府八百五十六

天祐以前方鎮六十四外有觀察使五防禦使六

關內十二 河南九 河東九 河北六 山南東四 河西二 隴右二 劍南五 淮南一 江

南東四 江南西四 黔中一 嶺南五 山南西四

田數

開元中一千四百四十萬三千八百六十二頃一十三畝

大中中一千一百六十八萬八千三百五十四頃

稅賦

天寶中租錢二百萬餘緡粟一千九百八十萬餘斛庸調絹七百四十萬餘匹綿一百八十萬餘屯布一千三十五萬餘端

大中中稅錢八百五十九萬二千六十一緡九百九十文

兵數

開元中四十九萬人

大中中九十九萬七百一十五人

馬數

開元中三十二萬五千七百匹

鹽數

肅宗上元以後九百萬餘緡

大中中四百八十一萬二千四百四十一緡三百九十文

運米

天寶中二百五十萬石

大中中一百四十三萬七千八百八十六石

茶錢

大中中六十萬三千三百七十緡九十七文

酒錢

大中中一百三十七萬九千九十一緡二百八十六文

鑄錢

天寶中三十萬七千餘緡

大中中一十八萬四千二百三十餘緡

歷

戊寅 高祖

麟德 高宗

開元大衍 明皇

寶應五紀 代宗

建中正元 德宗

元和觀象 憲宗

長

慶宣明 穆宗

景福崇玄 昭宗

外有中宗景龍之歷、肅宗至德之歷。

藏書五萬一千八百五十二卷。案此同舊書著錄數新書增二百四十三卷。

改元七十五

大赦三百一十九

貢舉二百六十七

舊書紀志傳約二百九十萬字

新紀志傳約一百六十四萬字

外新添表約一十一萬二千九百三十字

廢傳六十一

暢璫 趙國珍 韋元甫 裴胄 盧慈 姚令言 張光晟 源休 蔣鎮 洪經綸 彭偃 李

若初 于頔 盧徵 鄭元 薛任 閻巨源 李祐 董重質 張正甫 徐晦 盧商案以上二

書分次列傳新書以裴胄附裴灌以李若初于頔盧徵附劉晏以盧商附鄭肅以徐晦附文藝歐陽

以李祐董重質附藩鎮吳少誠以姚令言張光晟源休蔣鎮洪經綸彭偃併入逆臣朱泚叛臣喬琳祇

廢暢璫趙國珍韋元甫盧慈鄭元薛任閻巨源張正甫入傳

李君球 楊茂謙 閻濟美案以上三人舊書入良吏新書惟楊茂謙附循吏章景駿後以李君球

興 萬國俊 來子珣 王宏義 羅希奭案以上五人舊書入酷吏新書仍存王安義以周

李公逸 張善相 李玄通 馮立 謝叔方 成三郎 尹元真 薛愿 袁光庭 邵真案以上

書入忠義新書以李公逸張善相附李育德以李玄通附王行敏以馮立謝叔方附敬君宏

王君操案舊書與張琇分列 孔紹安 庾抱 鄭世翼 張蘊古 盧照鄰 楊燭 駱賓王 鄧玄挺 喬知之 富嘉謨 李

拯案以上十一人舊書入文苑新書文藝傳以庚抱附賀德仁以鄭世翼附崔信臣以張蘊古附謝偃
駭以盧照鄰楊炯駱賓王鄧玄挺附王勃以富嘉謨附尹元愷以孔紹安冠其孫若思前改列儒學祇
李拯二傳

許胤宗 乙弗宏禮 張愷藏 張文仲 尙獻甫 金梁鳳 葉法善 僧玄奘 僧神秀 僧一

行案以上十人舊書入方技新書仍存尙獻甫以許胤宗張文仲附甄權以乙弗
宏禮張愷藏金梁鳳附袁天綱以葉法善附薛頤祇廢玄奘神秀一行三傳

新添傳

后妃 郭貴妃 王賢妃

宗室 李從晦 李之芳 李知柔案原本李從晦訛李晦之芳訛之柔攷舊書已附李

增知柔附惠宣太子業今參據改正

諸帝公主案此下原本無目前載列傳人數云公主二百
十四人今攷新書諸帝公主傳實二百十二人

列傳 姜寶誼 段成式 温佶 温廷皓 高重 杜求仁 杜咸 石仲覽 趙來章 趙元

裴積 裴均 史大奈 馮子猷 契苾明 泉男生 泉獻誠 論弓仁 論惟貞 石抱忠 韓

思彥 陸希聲 裴佑先 韋顥 韋知人 韋維 韋繩 韋虛心 韓朝宗 宋務光 呂元

泰 武平一 盧襲秀 崔碣 韋縉 盧若虛 姚合 姚勗 蘇誥 蘇震 蘇幹 裴佶 嚴

澈 劉迺 劉秩 劉迅 李彙 荔非元禮 郝廷玉 李國臣 張伯儀 白元光 陳利貞

侯仲莊 烏承玘 元結 戴叔倫 趙惠伯 嚴郢 李德修 康日知 牛元翼 傅良弼 李

寰 劉潼 董溪 段伯倫 段文楚 陽閔 獨孤及 顧少連 杜孺休 杜顛 韓昱 陳諫

凌準 韓泰 杜羔 杜中立 劉義 皇甫湜 盧仝 賈島 鄭薰 敬晦 韋博 李景温

顧師邕 李貞素 崔嘏 丁柔立 劉助 蕭鄴 韋琮 鄭延昌 裴坦 盧光啓 韋貽範

韓偓 韓儀 周寶 鄧處訥 雷滿 劉巨容 馮行襲 趙德誼 趙匡凝 楊守亮 楊晟

顧彥朗 顧彥暉 李罕之 王敬武 孟方立 楊行密 孫儒 高仁厚 趙犖 趙昶 趙

珣 田頴 朱延壽 劉建鋒 成洸 杜洪 鍾傳 劉漢宏 張雄 王潮 劉知謙 盧光稠

案原本温信訛温倍盧若虛訛韋若虛杜孺休訛許儒林李景温訛李景讓鄧處訥訛鄧處晦今攷舊

獨孤及顧少連鄭薰敬晦韋博蕭鄴章琮鄭延昌裴坦盧光啓韓偓周寶鄧處訥劉巨容趙德誼楊守

亮楊辰顧彥朗李罕之王敬武孟方立楊行密孫儒高仁厚趙犖田頴朱延壽劉建鋒成洸杜洪鍾傳

劉漢宏張雄王潮劉知謙四十六人附泉獻誠論惟貞呂元泰傅良弼李寶章貽範韓儀雷滿馮行

及維高重杜求仁杜咸裴稷均馮子猷契苾明陸希聲裴仙先章顛章五人其姜寶誼段成式温信温

廷皓元泰盧夔秀崔碣章紹盧若虛姚合姚勗蘇震蘇幹裴信嚴澈劉迥劉秩劉迅李彙荔非元禮郝

孺休杜顛韓昱陳諫凌準韓泰杜羔杜中竝劉義皇甫湜盧仝賈島顧師邕李貞素崔嘏丁柔立陽閔杜

元方裴炎草湊韓思復桓彥範崔玄暉韋安石盧藏用姚崇蘇瓌裴纘卿殿挺之劉子玄李九弼楊炎

忠義 馬元規 王行敏 盧士叡 李育德 賈循 南霽雲 雷萬春 張興 蔡廷玉 孟華

證合

黃碭 孫揆分附盧士叔孫揆又以馬元規南齊靈雷萬春三人分附舊書已有之 呂子威許遠二

孝友 任敬臣 支叔才 程袁師 武宏度 宋思禮 鄭潛曜 元讓 萬敬儒 章全益 沈

季詮 許伯會 侯知道 許法慎 林攢 陳饒奴 王博武 案舊書孝友傳無此

隱逸 朱桃椎 秦系 張志和 陸羽 陸龜蒙 案舊書隱逸傳無此五人惟于大臣高士廉

循吏 韋丹 韋岫 韋宙 盧宏宣 薛元賞 何易于 案舊書循吏傳無此六

儒學 蕭子儒 案舊書儒學傳蕭德言後次許叔牙附以子子儒 沈伯儀 張齊賢 陳貞節 施

敬本 盧履冰 王仲邱 康子元 啖助 韋彤 陳京 韋公肅 案舊書儒學傳無沈伯儀

文藝 劉藏器 元正 元義方 元季方 王助 呂向 張旭 裴閔 皇甫冉 李觀 鄭虔

蕭存 柳井 盧綸 歐陽詹 歐陽柅 吳武陵 李頻 吳融 案舊書文苑傳無元正以下十

宋僅云從父兄子藏器亦有調學官至宋州司馬是亦未可謂有傳矣其與尙可孤同傳之李觀乃洛

陽人非贊皇李華之從子也新書文藝傳以藏器附其從兄廷祐以元正元義方元季方附元萬頃以

王助附王勃以張旭裴閔附李白以李觀附李華以蕭存柳井附蕭穎士增立

呂向皇甫冉鄭虔盧綸吳武陵李頻吳融又歐陽詹附以從子桓可與此證合

方技 袁客師 杜生 邢和璞 師夜光 羅思遠 姜撫 案舊書方技張果傳有邢和璞師夜光

以袁客師附其父天綱又增

立杜生姜撫可與此證合

列女 房玄齡妻盧 李奮母 泚女李 堅貞節婦李 高叡妻秦 王繼妻韋 盧惟清妻徐

饒娥 金節婦 高愍女 楊烈婦 賈直言妻董 段居真妻謝 楊含妻蕭 鄭孝女 李廷節

妻崔 殷保晦妻封絢 竇烈婦 李拯妻盧 山陽女趙 周迪妻 朱延壽妻王案舊書列女傳無此二十二人

新書皆增立可與此證合

外戚 鄭光案光為宣宗母鄉太后之弟舊書分著始末于太 鄭光案光為宣宗母鄉太后之弟舊書分著始末于太

宦官 駱奉先 劉貞亮 馬存亮 嚴遵美 仇士良 劉克明 劉季述 張彥宏案舊書宦官

于吐突承璀附仇士良于王守澄附劉季述張彥宏于楊復恭新書附駱奉先于舊有之程元振附嚴

遵美于分立之馬存亮改張彥宏與韓全晦同傳分仇士良劉季述與劉克明各為一傳惟駱奉先嚴

舊美已有傳且確著其非兩人而此入新添目內誤矣 外國 延陀 拔野古 僕骨 同羅 吐谷渾 契苾羽 多覽萬 訶咥 葛邏祿 找悉蜜

都播 骨利幹 白鬻 烏羅渾 烏丸 鞠 俞折 駁馬 大漠 黠戛斯 沙陀 流鬼 跋

祿迦 摩揭陀 寧遠 吐火羅 謝颺 識匿 箇失蜜 骨咄 蘇毗 師子 南詔上 南詔

下 蒙嶠詔 越析詔 浪穹詔 遼啖詔 施浪詔 扶南 投和 瞻博 室利佛逝 名蔑

單單 昆明 傍望諸蠻 西原蠻案吐谷渾白蠻烏羅渾南詔舊書已有傳此亦入新添目內殆以

邏祿拔悉蜜都播骨利幹黠戛斯沙陀流鬼摩揭陀寧遠吐火羅謝颺識匿箇失蜜骨咄蘇毗師子家

附烏丸鞠俞折駁馬大漢于白蠻後附跋祿迦于龜茲後附

姦臣 蔣玄暉 張廷範 朱友恭案舊書不題姦臣新書

叛臣

陳敬瑄

案舊書不題叛臣以敬瑄附官田令孜傳新書改入

逆臣

董昌

案舊書無傳新書增列逆臣秦宗權後

舊志十一種

禮儀

音樂

歷

天文

五行

地理

職官

輿服

經籍

食貨

刑法

新志三種

儀衛

選舉

兵

表四種

宰相

方鎮

宗室世系

宰相世系

唐書著于五代幅裂之際成篇迫遽殊未詳悉故有詔纂緝十餘年矣今廣內藏書之盛傳記可以質據者得大衍景福之歷而律歷志可完矣得職該六典之書而百官志可完矣得開元曲臺禮郊祀錄而禮樂志可完矣若劉昫抵牾之甚蒙竊能道其一二或缺而不傳如賈循南霽雲之忠李翱武平一之文張志和武攸緒之高尙是也或立傳而無所沮勸若竇德明夏侯孜之循默祖孝孫傅仁均之曲藝龐嚴李景儉之疎放是也或缺其本而不載若張巡之哭廟與兵顏杲卿之指衣定謀是也或事淺近而書若牛僧孺太平之對楊再思諂二張之美是也或善惡同傳若李石之與僧孺楊綰之與常袞是也或子孫無大善而析以別傳若蕭俛不附蕭華杜元穎不附如晦是也

案此總論唐書特傳同傳題別傳附傳之抵牾

所指缺而不傳之李翱武攸緒未入前新添目內似前日有脫漏而李翱在舊書雖未列文苑已與韓愈同傳實未嘗缺武攸緒舊附外戚武承嗣後或嫌其善惡同傳固宜如新書之改列隱逸乃概謂之缺而不傳亦未諦審謹因校刊附識

呂縉叔唐書直筆郡齋讀書志謂其在書局時建明按宋史稱縉叔學長於史貫穿唐事博采傳記雜說折衷整比又通譜學創爲世系諸表於新唐書最有功今觀其書發揮體例謹嚴精覈徵之唐書合者十之八九蓋深見取於歐宋也然兵志爲新志三種之一而讀書志又稱其別著兵志三卷祕之是當時意見亦不能盡同而縉叔於唐書猶有不慊然者甚矣修史之難而官書之不能畫一也殘暑初退點筆一過識此賓之



讀舊唐書隨筆

蔡世欽著

讀舊唐書隨筆

本館據豫章叢書
本影印初編各叢
書僅有此本

讀舊唐書隨筆

玉山 蔡世鉞 石坪 著

吳兢傳兢有史才敘事簡要蕭嵩奏取所撰國史六十
五卷韋述傳國史自令狐德棻至於吳兢雖累撰述竟
未成一家之書述始勒成國史百一十二卷事簡而記
詳蓋兢述同於秘閣詳錄四庫書者述史固多於兢矣
楊綰引德棻曾孫峘入史館修元代二宗實錄憲宗紀
峘子進
峘所撰代宗實錄四十卷裴
迥進所撰德宗實錄五十卷
石晉時昫所增爲百九十
卷備一代之書者雖因峘舊文亦非令狐一家書也今

目錄列二百卷疑分併異於昫原書而昫序亦闕

高宗永淳二年十一月無癸亥後書戊戌詔皇太子監國丁未自奉天宮還東都則皇太子來朝癸亥幸奉天宮乃十一月以前事秋七月不得有兩己丑前書己丑封皇孫重福爲廣昌郡王甲辰相王輪改封豫王則令重福爲京留守召皇太子至東都乃同甲辰日事中間己巳河溢在八月庚戌熒惑入輿鬼在九月文不具也帝崩在十二月己酉改元宣詔之夕皇太子卽位在十二月丁巳七日而殯之後后紀連大帝崩爲文實不同

曰

證聖起乙未春一月訖乙未秋八月無所謂證聖二年也證聖之有二年則見地理志新舊書並同按證聖元年九月改元天冊萬歲其臘月又改元萬歲登封是天冊萬歲不成乎年也不成乎年故紀年不數天冊而通數證聖登封未改元之正月不得不屬證聖二年矣萬歲登封以臘月改元與證聖共在歲乙未昫書原本連屬殆未爲誤也

考證以萬歲登封元年連於證聖元年後爲誤故改今本

地理志

必乙未正月事故稱證聖二年正月者子月也武后依

周制故十二月爲臘月改舊正月爲一月

貞元七年二月己巳涇原帥劉昌復築平涼城昌復浹旬而功畢兩復字並衍文三月甲子劉昌築胡谷堡改名彰義堡卽十一年春於涇川彰信堡置潘原縣者當據劉昌本傳又於平涼口別築胡谷堡名曰彰信非彰義也

是年正月壬戌朔二月不當又有己巳當是癸巳之訛

太和三年五月丙申橫海軍節度使李祐卒祐本傳非橫海軍乃滄德景節度也先是柏耆殺李同捷而祐以是日入滄州不言祐疾也祐送同捷母妻及男赴闕而

者以是日貶循州不因祐疾也耆爲宣慰使而諸鎮怒之必有專擅失道者貶耆已足謝諸鎮何至於殺耆若祐卒月餘乃賜耆自盡無與諸鎮之怒矣故紀傳皆略不書通鑑李祐聞柏耆殺萬洪大驚疾遂劇上曰祐若死是耆殺之也癸酉賜耆自盡此是李祐赴闕丁亥後丙申前十日內事蓋祐有平蔡擒元濟功見重於文宗聞其病劇所由而歸罪於耆故於其卒也而賜耆死耳豈循州之貶亦坐此乎

會昌二年中書奏赴選官人多京債到任填還致其貪求罔不由此所冀到任不帶息債衣食稍足可責清廉息債之累自古已然無有甚於今日者 定制月選官

許借支養廉較當日加給兩月俸料體恤尤厚然仕途壅滯有三四年爲選人者將何道而俾免京債必有能起而議之

大中二年勅昨以李威所訴已經遠貶當從李德裕傳作李咸咸與汝納訟德裕皆白敏中令狐綯崔鉉等使之然衛公亦有自取之道焉觀其奏請重修憲宗實錄用意彌縫適形其謬耳

肅宗張皇后傳去惑去疑去奢去逸皇姨弟也皆至大官去盈尙元宗女常芬公主去盈當卽去奢

紀傳多從原文劉昫未及改正苑君璋傳稱執我行人
猶竇皇后傳稱歸於我帝其類甚多非難辨也論贊則
唐史臣筆更一目瞭然韓愈蔣係論順憲二宗偶存其
名豈昫書之例焉

廬陵王瑗武德元年歷信州總管河間王孝恭二年授

信州總管三年改信州爲夔州使此信州爲江南東道

武德初置

地理志漢魚復縣梁置信州周爲永安郡隋爲巴東郡武德元年改爲信州

乾元

初江南東道置信州敬宗紀長慶四年二月丙戌貶翰
林學士駕部郎中知制誥龐嚴爲信州刺史是也新書

屬江南西道

巢刺王傳文與李綱傳複四百三十字劉昫未及刪改按本傳高祖怒甚以下至皆非其罪也俱當刪去但云高祖以罪歆賴李綱對得免足矣蓋語具綱傳也綱傳歆頻諫不納下可兩言彙括之曰乃表以聞及并州陷竟接高祖怒甚刪去乃上表曰以下至并州遂陷以上較爲直捷蓋表文及使父老詣闕憤士達致陷於武周皆巢刺王傳本事與李綱無涉

李靖李勣合傳輔公祐自保石頭城遣陳正通等率步

騎屯青林馮惠亮率舟師二萬屯當塗所謂水陸分守也當塗軍鐵連巨艦仍於江西結壘青林軍仍於梁山屯築城柵十里所謂犄角之勢也前敘連鐵鎖以斷江路是惠亮舟師非正通步騎六字似衍文後敘水陸兵

各十萬亦與三萬二萬牴牾

當塗河間王傳作博望山

凌煙閣二十四人趙公第一故其與遂良誣陷劉洎吳王恪於前枉害道宗於後宗室傳論以爲天網不漏者本傳俱不之及而獨哀死非其罪益不欲以罪掩功也英公傳不敘勸立武氏亦猶其意耳然高宗紀先書遂

良以諫立昭儀貶次書無忌以冊立皇后命可謂微而顯矣無忌傳載貞觀十七年圖畫功臣詔遺漏申公士廉一人

房元齡傳太宗因謂諸功臣以下百七十七字與淮安王傳文複但改神通理屈句云及見太宗以漢蕭何指蹤推轂喻神通神通理屈可櫟括其事

碑仆復立故只載停婚然十漸不終文貞早見及此矣此疏當從新書補入若諫資送公主事已見文德皇后傳宜刪

太宗櫛風沐雨未暇詩書

鄧世隆傳

故特開文學館杜如晦

房元齡以下

于志甯蘇世長薛收褚亮姚思廉陸德明孔穎達李元道李守素虞世南蔡允恭顏

相時許敬宗薛元敬蓋文達蘇勗

謂之十八學士望比登瀛焉及圖形

而薛收已死太宗嘆之其承命而各爲之贊者褚亮也故載亮傳顧敬宗何人而薰猶同器贊之得毋污陽翟筆耶

裴聞喜

行儉

以憂患武后左遷劉樂城

仁軌郝甌山

處俊侃侃

正論能折武后之心前史韋述拘泥諛法詆謏樂城與

聞喜子

光庭

同譏毋乃以一青掩大德乎傳後各載韋說

而於總論折衷之可謂狄梁公嚆矢矣

前唐紹傳先天二年冬今上講武驪山後澤王上金傳
開元十二年今上削瑒王爵復召義珣嗣澤王則徐有
功傳今上踐祚自是元宗時史臣之稱不書年號可知
楊元亨兄弟以忤易之而族被凶名崔義元父子以贊
武氏庇昌宗而世榮列戟人心豈尙有好惡耶然彼此
對鏡邪正瞭然得春秋比事微指

于燕公

志甯

輔導皇儲始終無忝厥職而王皇后被廢嘿

持兩端斯白璧之玷矣事有世所共知若李英公協贊

武氏者但附見他傳若燕公用意甚微則特著之本傳使賢者知所戒潛雖伏矣亦孔之昭可不謹歟

裴

炎
劉禕

之廢中宗立豫王也可謂教猥升木矣無端

舉廢立大柄假之女后以爲己功乃欲其返正得乎顧託之臣如此其死又何足惜

張柬之中興之力薦之者狄梁公梁公復辟之功薦之者閻右相右相觀過知仁再造唐室以馳譽丹青目之王逸少人以書掩獨非晉史之過歟

遺表薦宋璟李傑李朝隱盧從愿其惓惓身後且如此

盧懷慎豈伴食相哉嚮非同掌樞密者固姚崇恐亦未能多讓矣子奐弟奕並傳清白其家風亦正可想

李林甫自無學術以九齡文行爲上所知心頗忌之乃引牛仙客知政事此元宗治亂大關也雖無武惠妃陷太子事邪正能兩立哉曲江諫止而林甫代相自載太子瑛傳不必遽謂無識

牛仙客信孫閱休咎之談乃張九齡傳載周子諒妄言休咎意子諒卽據休咎之言以徵仙客不宜登相位及廷詰辭窮乃斥爲妄歟崔希逸奏仙客河西狀正林甫

引仙客之端也三傳互參詞意始備

高仙芝之平勃律也約七月十三日辰時會吐蕃連雲

堡計自安西往連雲堡日程當在六月前五十餘日矣

八月虜勃律班師九月復至連雲堡與邊令誠等相見

其月末還密播川使告捷及還河西夫蒙靈督罵仙芝

令誠具奏其狀以仙芝代靈督爲四鎮節度計日程正

當十二月

播密川七十餘日至安西

封常清傳天寶六載從仙芝破

小勃律十二月仙芝代靈督爲安西節度是也本傳其

年六月制授仙芝云云當改十二月前於勃律公主出

降並平其國下始接天寶六載乃史家倒裝文法

竇參得罪其故詳李巽傳而班宏傳云宏頗有力焉者蓋宏惡參傾參參又薦張滂以制宏滂按徐粲徙嶺表則宏爲粲故而惡之傾之愈力不獨謀殺於巽也通承上副竇參以下言非有關文

李泌傳必妄庸子所作彼方以泌爲長於鬼道故得大用及在相位隨時俯仰引輕薄之流者雖明知其生平大節如新書所載豈肯更一語及之哉劉昫弗加深考與王璵同列一卷論擬以左道惑衆殺嗟夫桓靈堯舜

數語使盧杞姦邪卒於貶所爲鬼道者安得此言耶

李西平十五子憲次第十又云憲晟第五子晟十子憲
愬最仁孝前後傳文牴牾

上不負天子下不負吾所學乃所以爲陸宣公也吉甫
罪有可貶則貶之及相遇忠州不銜前事吉甫禮誠厚
矣宣公何慙焉又何懼焉陛下怒臣未已姜公輔此奏
明云得之竇參是時參已貶郴州宣公何心必死之而
後快哉乃謂參死贄有力焉則時議之繆妄不當採入
傳姜公輔傳服闋授右庶子久之不遷洎陸贄知政事
以有翰林之舊數告贄求官贄密謂公輔曰子嘗見

郴州竇相言爲公奏擬數矣上旨不允有怒公之言據此宣公止姜之求官非欲死竇也公輔恐懼上疏乞罷官爲道士久之未報後又庭奏德宗問其故公輔不敢洩竇便以參言對帝怒貶公輔爲泉州別駕又遣中使賈詔責參按宣公本傳公輔奏稱竇參嘗語臣云陛下怒臣未已德宗怒則因是而貶公輔詔責參於宣公無與也公輔不敢洩竇便以參言爲對二句

正時議謂參死竇與有力者繆妄甚矣
一狂獷書生謀專節鉞統領三川之請劉闢也非韋臯也臯爲社稷大計欲表請皇太子監國使闢京師覘人情附叔文否及宰相執誼相與何如耳乃謂臯惑其奸說志未可量斷不其然

惡人不禁其有後而善者不獲令終王武俊者史思明

恆州刺史李寶臣裨將耳寶臣卒子惟岳謀襲位時兼

有易深趙滄冀定武俊子士真縊殺之上聞授武俊恆

冀而深趙授康日知易定滄授張孝忠武俊怒失趙定

二州朱滔亦怒失深州同叛僭稱趙王以恆州爲真定

府不已悖乎興元下詔削僞號授成德軍節度與李抱

真合軍鉅鹿走朱滔升恆州爲都督府武俊爲長史子

士真佐父立功繼立恬然守善不可謂非承順也承宗

士真

長子 虜德棣

隸保信軍

觀察薛昌朝盜殺宰相武元衡叛逆

實甚及吳元濟誅始懼李師道死奉法逾謹弟承元泣

辭留後朝命田宏正帥成德軍斯不愧士真子矣乃其
衙內兵馬使王廷湊盡害宏正將吏家族與朱克融謀
拒王命雖有子元逵素懷忠順頓革父風然使力善者
遭慘毒君子觀沂國父子宏正子布而嘆天之不欲治唐矣

居喪奪情日起復程日華貞元四年卒子懷直起復爲

留後滄州橫海軍明年起復正授節度觀察使再書起復於

文爲複然服尙未闕於義無失也考證則謂貞元二年

卒不當云起復以服闕故

順宗二十三子莊憲皇后王氏生憲宗皇帝下當遺福

王綰三字蓋福王傳明言毋莊憲王皇后憲宗同出也
餘十八王本錄不載母氏當是十七王新書前王昭儀
作張昭訓後王昭儀又生邵王約岳王緄別有據

敬宗晚朝劉栖楚額叩龍墀出血苦諫何其言之似於
忠也然使因此而信爲忠得益逞其鷹犬之才則搏噬
何所弗至矣其忠也正所以爲佞歟

薛元夫

戎

操心如一不可動搖其置佛寺時猶其居陽

羨耳豈以威劫而搆成人罪哉故君子貴乎養之有素
贊質兄弟不詔權貴穆秘監甯之教也寒松倚巖之槩

身後可想然李臨淮爲天子討賊必待敕而後饋數萬衆不潰散即是謂可與守正不可與明權

韓宏一日殺三百人對賓僚談笑自若很甚致書武元衡恥在王鏐下敖甚雖居統帥不欲諸軍立功賊甚敖很且賊心中豈尙有朝廷哉以英明如憲宗不能制之以禮苟非勢屈入覲惡知其所終焉故曰幸也

先處分停日膳而後迎充李質不留弊以遺帥也韓充當兄宏節制宣武時謙恭得士心故不戰而入大梁其感汴人者有素矣又得牙將如質者軍政安得不諧焉

盧杞沮李懷光之朝致叛以王翊告故已見杞傳矣崔甯之殺翊與謀焉本傳不載殆愛而不知其惡也抑重表其威望智術而黨邪害正止於杞傳微著之而不欲顯暴其惡歟

薄於德於禮虛其王彥威之謂矣彥威判度支內官請託無不如意豈尙存禮意乎元和新禮三十卷卽謂彥威干進之書可

昌黎之史才何至繁簡不當敘事拙於取捨蓋內官惡其切直其拙也正所以爲史才也事載路隨傳隨奉詔

改進憲宗實錄文宗復令改正永貞時事故韋處厚別
撰順宗實錄三卷無復昌黎筆矣特存昌黎及其婿蔣
係論於順憲二宗紀後則路韋亦有不欲盡沒者乎

贊謂全義逃責貞元失策是已謂霞寓薄刑元和復興
則否論云朝無責帥之刑蓋自恥也恥之一字甚於刑
霞寓之可恥甚於全義

孟簡疏論吐突承瓘語訐得罪矣又從而賂之殺陸翰
以滅口傳僅譏其濁浮圖竊謂明於內典者必不喪心
病狂至此

李端盧綸不入文苑而見於虞仲簡辭傳簡辭兄弟雲
搏水擊鬱爲鼎門固已虞仲第敘官階亦因子以傳父
恐非義例

王鐸鎮魏州行則肩輿妓女夾侍賓僚服御盡美一時
樂彥訓豔而害之宜矣僖宗國步已艱不思枕戈飲血
區區以收京城功自侈許以忠義殊恐過當錄其功焉
可耳

王涯不與訓注之謀亦以赤族史謂其貪權固寵不遠
邪佞雖未明著其事而鹽鐵榷茶諸使皆訓注力也百

姓方投以瓦礫較璠餽諸人作孽尤重矣又何冤焉
張仲方傳謹按謚法下脫曰敬者夙夜敬戒曰敬書曰
敬明乃訓易曰一十七字憲下脫也字法也上脫刑也
二字當依沈鈔本補入

文章非素與遊無從得而選卽選亦不多非意存厚薄
勢有所隔也裴潏續文選三十卷時論未可以此非潏
且不入昭明之選而文自足千古者有矣苟我足以傳
雖素不與潏遊何憾

悉怛謀之死文饒極傷心痛恨事所謂舉城受酷由臣

陷此無辜也况河湟一失貽害國家僧孺之罪可勝道哉